

Naqqiut

Siunnersuut 12. august 2019-imeersaq taarserpaa
(Teknikkimut kukkunersuinermit tunngasunik iluarsiisoqarpoq, kiisalu inatsisip
oqaasertaanni iluarsiinernut sunniutaasumik iluarsiisoqarluni)

Siunnersuummut nassuiaatit

Nassuiaatit nalinginnaasut**1. Aallaqqaasiut**

Siunnersuummik ilaatigut siunertaavoq sulinermit ilanngaammik atuutilersitsinissaaq. Sulinermit ilanngaat sulinissap kajungernerulersinnissaanut tapersiissaaq, inuillu ataasiakkaat sulinermit il.il. isertitai tunngavigalugit naatsorsorneqartassalluni. Ilangaat inuit sulisut appassisumik aamma akunnattunik isertitaqartut ukiumut aningaasanik atoriaannaasaannik 4.100 kr.-t missaat tikillugit qaffatsitsissaaq.

Ilanggullugu akissarsiat, immikkut kukkunersuinermit Politiets Efterretningstjenestemit akilerneqartut siunnersuummi akileraarutaasussaaqjunnaarsinniarnearput.

Siunnersuummi aamma siunertaavoq aningaasarsianik akileraarutit pillugit Inatsisartut inatsisaata allangortinnissaa, taamaasillutik malittarisassat, kapitali 4a-tut ilanngunneqartut, soraarnerussutisiaqarnissaaq siunertaralugu ileqqaakkat pillugit Inatsisartut inatsisaanni nr. 29, 28. november 2016-imeersumi, inatsisip allangornerata kingorna misilittagarilikkanut tulluarsarneqassallutik.

2. Siunnersuummi immikkoortut pingaarnertit*2.1. Sulinermit ilanngaammik atuutilersitsineq*

Sulinermit ilanngaateqarnikkut innuttaasut sulisut atugaat pitsanngorsarneqassapput. Ilangaat inuit sulinissamut aningaasaqarnikkut annerusumik kajumissuseqarnerulernerannik sulinermilu iluanaaruteqarnerulernerannik kinguneqassaaq. Siunnersuut aamma aningaasarsiat aningaasartuutillu katitigaasut nikingassutaasa procentiisa annikinnerinik ajornartorsiuteqarneq, appassisumik akunnattumillu isertitaqartunut ajornartorsiutaasinnaasoq, annikillisisissaaq. Taamaalilluni siunnersuut innuttaasunut sulilernissamut kajumissuseqarnerulersitsisinnaalluni imaluunniit suliffeqaannartitsisinnaalluni.

Ilangaat sulinermit il.il. isertitat, inummut ilanngaammik kiisalu ilanngaammik aalajangersimasumik qaangiissut tunngavigalugu naatsorsorneqartassaaq. 2019-imi inummut ilanngaat aamma ilanngaat aalajangersimasooq 58.000 kr.-upput.


Sulinermit ilanngaat annertusiartortinneqassaaq, taamaasilluni, 198.000 – 386.000 kr.-t akornanni tunngaviumik isertitaqarnermi ukiumut 9.800 kr.-ussalluni. Sulinermit

ilanngaatip inuup akileraareerluni aningaasat atoriaannaasaanik 4.214 kr.-nik annertusaassaaq akileraarut 43 %-iuppat.

Siunnersuutigineqarpoq, sulinermut ilanngaat inunntut appassissumik akunnattumillu isertitalinnut siunnerfilerneqassasoq annikillisaanikkut. Ilangaammik annikillisaanerup, sunniuteqaqataaffigissavaa ilanngaammut aningaasartuutit annikillisarneri. Sulinermut ilanngaat annikillisarneqassaaq tunngaviusumik isertitat ukiumut 386.000 kr.-t sinnerpagit, taamaasilluni 606.000 kr.-nik sinnerlugilluunniit tunngaviusumik isertitaqarnermi 0 kr.-ussalluni.

Siunnersuummik inuit 11.000 missaanniittut qaffasinnerpaamik sulinermut ilanngaammik pisassasut missiliorneqarput. Inuit 16.000-it missaanniittut annikinnerusumik sulinermut ilanngaammik iluaquteqartussatut naatsorsuutigineqarput. Akileraartartut katillugit 38.000-t missaanniipput.

Sulinermut ilanngaat inunntut appassissumik akunnattumillu isertitalinnut siunnerfilerneqarpoq. Isertitaqatigiinni taakkunani nalinginnaasumik, aningaasarsiat aningaasartuutillu katitigaasut nikingassutaasa procentiini annertunerpaamik unammillernartoqarfiupput. Unammillernartumut pissutaavoq inuup isertitaasa qaffannerani akileraarusiinermik nassataqarnera kiisalu pisortanit ikiorsiissutinik annikilliliineq.



Titartagaq 1: Paasissutissarsiffik Aningaasaqarnermut Naalakkersuisoqarfik

Titartakkami takuneqarsinnaavoq, inoqutigiit marlunnik meerartallit, ukiumut 298.000 kr.-nik inoqutigiullutik isertitaqartut, isertitaat 1 kr.-mik qaffariarpata, innuttaasooq 35 øremik isertitanik atuisinnaanerulissasoq, akileraarut (42 øre) pissutigalugu kiisalu ineqarnermut

tapiissutit, meeqqanut ikiorsiissutit aamma ulluunerani paaqqinnittarfimmut tapit annikillissammata (23 øre).

Ikiorsiissutit taaneqartut inoqutigiinni meeqqat amerlassusaat naapertorlugit aalajangersarneqartarmata, pissutaasoq tamanna tunngavigalugu aningaasarsiat aningaasartuutillu katitigaasut nikingassutaasa procentii nikerarput. Nalinginnaasumik unammillernartoq appassisumik akunnattumillu isertitaqartut akornanni annertunerpaasarpoq, pisortat ikiorsiissutaat inoqutigiinni 450.000 kr.-t missaanni qaffasinnerusumillu isertitaqartuni amerlanerpaatigut annikillisarneqartarmata.

Inuit sulinermut ilanngaammut ilaapput:

- Kalaallit Nunaanni tamakkiisumik akileraartussaasut, Kalaallillu Nunaata avataani akileraarutit eqqarsaatigalugit najugaqanngitsut.
- Tamakkiisumik akileraartussaannermik aaqqissuussinerup ataani atorfeqanngitsut.

Tunngaviusumik isertitanut ilaapput inuup aningaasarsiai A-t aamma B-t katillugit. Sulinermut ilanngaatip isertitanut, suliffeqarnermut atatillugu isertitaasunut pingaarnertut iluaqutaanissaanik siunertaqarnermut atatillugu, tunngaviusumik isertitani ilaanngillat isumaginninnikkut tapiissutit, soorlu pisortat ikiorsiissutaat kiisalu suliffeqanngikkallarnermi ikiorsiissutit. Ilanggullugu soraarnerussutisiat, ass. utoqqalinersiat aamma soraarnerussutisiaqarnissamut aaqqissuussinerit nammineq pigisat tunngaviusumik isertitani ilaanngillat.

Sulinermut ilanngaat naatsorsorneqartarpoq tunniunneqartarlunilu pisussaasunut akileraarutitigut paasissutissat, matumani nammineq nalunaarsuineq tunngavigalugit. Ukiumut isertitaqarfiusumut tulliuttumut sulinermut ilanngaat inaarutaasumik naatsorsuinermut atatillugu naatsorsorneqartarpoq. Sulinermut ilanngaammik tunniussineq akileraarutinik sinneqartoorutinik tunniussinermut atatillugu tunniunneqartarpoq. Ukiumut isertitaqarfiusumut 2020-mut sulinermut ilanngaat assersuutigalugu august 2021-mi tunniunneqassasoq naatsorsuutigineqarpoq.

Siunissaq ungasinnerusoq eqqarsaatigalugu naatsorsuutigineqarpoq, sulinermut ilanngaat qaammatikkaartumik naatsorsorneqarsinnaallunilu ilanngaatigineqartarsinnaassasoq. Tamatumunnga piumasaqaataavoq tamanna sioqqullugu akileraartarnermut ingerlatsivimmi IT-kkut aaqqissuussinernik naleqqussaaneq, pitsaanagerusumik siusinaartumik nalunaarsuisarneq kiisalu aningaasarsiat A-nik tunniussinermut atatillugu sulisitsisut pisussaaffinnik arlaqarnerusunik tunineqarnissaat.

Sulinermut ilanngaat ilanggullugu aningaasarsianit akileraarutit pillugit inatsisartut inatsisaanni kiisalu akileraarutinik aqutsineq pillugu inatsisartut inatsisaanni malittarisassat nalinginnaasut naapertorlugit aalajangersarneqarpoq, ass. Akileraarusiinermik Aalajangiisartunut naammagittaalliuteqarnermut il.il. atatillugu.

Aalajangersagaq, tassani ilanngaata aningaasallu killingi aalajangersarneqarlutik, sulinermut ilanngaatip qanoq naatsorsorneqarnissaata ersarinnerulernissaa siunertaralugu tusarniaanerup kingorna allanngortinneqarpoq. Allannguulli siunnersuutip imarisaanut sunniuteqanngilaq.

2.2. Akissarsiat immikkut kukkunerisiuinerit ataanni Politiets Efterretningstjenestemit akissarsiaritinneqartut akileraaruteqaataajunnaarnissaat

Siunnersuut saqqummiunneqarpoq Politiets Efterretningstjeneste pillugu inatsimmut aaqqiissummik siunnersuummut tusarniaanermik Kalaallit Nunaata tigusaqareernerata kingorna. Aaqqiissutip ilaatigut imaraa nalunaaruteqartunut, paasissutissiisunut il.il. akissarsisitsinnaaneq. Akissarsiat taakku suliap qanoq ittuunera naapertorlugu sakkortulluinnartumik isertugaataasariaqarmata, Danmarkimi akileraaruteqaataannginnissaat kiisalu isumaginninnikkut ikiorsiissutinik naatsorsuineri tunngavinnit ilanngunneqannginnissaat aalajangerneqarsimavoq. Siunnersuummik matumangga siunertarineqarpoq taamatut akissarsiat taakku isertitanik akileraaruteqaataasussanik naatsorsuineri ilanngunneqartannginnissaat.

Siunnersuutip Politiets Efterretningstjenestip sulinerani isertuussineq atatiinnarlugulu qulakkiissavaa.

Politiets Efterretningstjeneste pillugu inatsimmut aaqqiissummik siunnersuutip atuutilersinneqarnissaanut ataqtigiiissarniarlugu, siunnersuutigineqarpoq Naalakkersuisut pisinnaatinneqassasut atuutilerfissaq nalunaarutikkut aalajangersinnaassagaat.

2.3. Soraarnerussutisiaqalernissaq siunertaralugu ileqqaakkat

Pingaaruteqarsimavoq oqimaaqatigiinnermik nassaassalluni siullertut soraarnerussutisiaqalernissamut ileqqaartut aningaasanik ileqqaakkaminnik aningaasaliisinaanissamut kissaataat, taakku naliusoq atatiinnassagaat kiisalu naammaginnartumik iluanaarutaanissaat eqqarsaatigalugit, aappaattullu ileqqaartut pigisanut nalilinnut assigiinngitsunut atatillugu aarlerinaatinik itinerusumik ilisimasaqakkajunneq ajortut, kukkusumik aningaasaliinerup kinguneranik annaasaqarnissaannut illersorneqarnissaat eqqarsaatigalugu. Inatsisartut inatsisaanni nr. 29, 28. november 2016-imeersumi Savalimmiuni misilittakkat tunngavigalugit kiisalu Kalaallit Nunaanni aningaaseriviit oqaloqatigereernerisigut aalajangerneqarpoq, soraarnerussutisiaqalernissaq siunertaralugu ileqqaakkani aningaasat taamaallaat nioqqtissani, aningaasaliissutit tamarmik annaaneqarnissaannut killeqartumi imaluunniit paasiuminaanngitsumi taamaallaat aningaasaliissutigineqarsinnaasut, kiisalu aningaasaliinerit aarlerinaatinut immikkoortukkaanut agguataarneqarsimassasut. Tamatumuunakkullu aamma aalajangersarneqarpoq, soraarnerussutisiaqalernissamut ileqqaartunut ataasiakkaanut aarlerinaat annikillisarneqassasoq, pineqartoq utoqqaliartortillugu, taamaasillutik annaasaqaataasinnaasut anguneqarsinnaassammata, pineqartup sulinerani, taamaasillunilu

soraarnerussutisiaqalernissap qanilliarthornerani annaasaqaataasussatut aarlerinaataasut annikittunnguussallutik.

Ukiut aalajangiisuutillugit aarlerinaatip annertussusissaanik aalajangersaanerup kinguneraa, § 47 c, imm. 2 aamma imm. 3 naapertorlugit, ileqqaartunut peqqussutaavoq pigisat nalillit annertussusaat imaluunniit nioqqutissat arlalinnik imaqtartut oqimaaqatigiissaareqqeqqullugit, taakku ukiup naanerani aarlerinaataasinnaasut qaffasinnerpaartaat, § 47 c, imm. 1-imi aalajangersarneqarsimasut qaangerpagit. Oqimaaqatigiissaareqqinnissamut pisussaaffik taanna aalajangersaaneq ikaarsaarfiusooq malillugu inatsimmi § 2, imm. 2-mi, 1. januar 2020 aallarnerfigalugu atuutilissaaq.

Aningaasaqarnermut Naalackersuisoqarfiup ingerlaavartumik Kalaallit Nunaanni aningaaseriviit oqalliseqatigisarsimavai, taakku tikkuarpaat, malittarisassat aalajangersarneqartut akimmisaarnarpallaartutut isiginarsinnaasut kiisalu soraarnerussutisiaqalernissamut ileqqaartunut iluanaarutini annikippallaanik annaasaqaataasinnaallutik. Tamanna ataqatigiippoq, soraarnerussutisiaqalernissamut ileqqaartut namminneq aningaasat ileqqaakkatik pigisani nalilinni aalajangersimasuni aningaasaliissutigisinnaassappatigit, naleqquttumik aarlerinaatinik siammaanissaq angujuminaassinnaammat. Tassunga ilaavoq, § 47 c, imm. 2 aamma imm. 3-mi oqimaaqatigiissaareqqinnissamut pisussaaffik, soraarnerussutisiaqarnissamut ileqqaartup, ukiuni pissutigalugit aarlerinaatinut allanut nuunnermini pigisanik nalilinnik, ass. aktiaatinik børsimi allattuiffimmi nalunaarsorneqarsimasunik, tunisisariaqarnermut aarlerinaammik imaqarmat, tamannalu piffissami pitsaanngitsumi pisinnaammat, tassani nali iluaqtissaanngitsoq pissutigalugu annaasaqarneq piviusunngorsinnaalluni.

Akilerarnermut oqartussaasuttaaq soraarnerussutisiaqalernissamut ileqqaartut aarlerinaatinik malinninnerat pillugu nakkutilliinermik suliaasaat, inatsimmi aalajangersarneqartoq, aamma naammaginangitsumik artornartuusinnaavoq immaqalu sunniutissaqarsinnaanani.

Aningaaserivinnik nakkutilliineq toqqaannartumik qallunaat Finanstilsyniannit akisussaaffigineqarpoq, tassani aningaaserivinnut inatsisit suli angerlaanneqanngimmata. Finanstilsynili kontunik sunniuteqarluartumik nakkutilliisinnaanngilaq, Danmarkimili aningaaserivinnik nakkutilliinermi aningaaseriviit soraarnerussutisiaqarnissamut aningaasaateqarfinni annertunerusumik aningaasaliisariaasiannik nakkutilliineq sungiusimallugu. Danmarkimi EU-llu sinnerani tunngavimmik ”prudent person” pillugu eqqussisoqarsimavoq, t.i. aningaaseriviup aningaasaliinerit ima aqqissuutissagai, ileqqaakkat nalingat paariinnarneqassalluni, aningaaserivillu aarlerinaammik paasineqarsinnaanngitsumik akisussaaffilissanngitsoq.

Tamanna tunngavigalugu Naalackersuisut isumaqarput, aningaasarsianit akilerarutit pillugit inatsit iluarsineqartariaqartoq, taamaasilluni tunngavik tamanna Kalaallit Nunaanni inatsisini

eqqunneqassalluni, taamaasillunilu soraarnerussutisiaqarnissamut ileqqaartut namminneq aningaasaliinissamut aalajangiisussanngussanngitsut, soraarnerussutisiaqalernissamut ileqqaakkanut kontumut aningaasanik ikisisoqarnerit tamaasa. Taarsiullugu ileqqaartut ileqqaarinermut kontut aningaasaateqarfimmut ataatsimut imaluunniit arlalinnut, aningaaseriviup neqeroorutigisaanut, assigiinngitsunik, akisussaassuseqartumilli aarlerinaateqartunut atassuteqalersissavaat.

Taamaasilluni aningaaserivimmut periarfissaassaaq aningaasaateqarfimmut aningaasaliinissamut periarfissiinissaq, tassani aningaaseriviup iluani imaluunniit avataani siunnersortit aqutigalugit pigisanik nalilinnik arlalinnik aningaasaliisinnaalluni, tamatumuuna aarlerinaatinik siammaaneq malunnartoq anguneqarsinnaalluni. Aningaaserivittaaq tamatuma saniatigut aningaasaliinermit aningaasaateqarfiit assigiinngitsut atukkiussinnaavai, tassani ileqqaartut nammineerlutik pigisani nalilinni, aningaaserivimmit toqqarneqarsimasuni aningaasaliinissamut periarfissaqarlutik, taamaasilluni aningaasaateqarfimmut pineqartumut atatillugu annerusumik minnerusumilluunniit aarlerinaateqarsinnaalluni, kisiannili suli aningaaserivik siammasissumik aarlerinaatinik siaruarsimasunik neqerooruteqarsinnaalluni.

Inatsimilli taama allannguinermit naatsorsuutigineqarpoq, soraarnerussutisiaqalernissamut ileqqaartut ataasiakkaat aningaasaliinerinik oqimaaqatigiissaareqqinnissamik pisariaqartitsisoqassanngitsoq.

Aningaasarsianit akileraarutit pillugit Inatsisartut inatsisaannik nr. 29, 28. november 2016-imeersumik allannguinermit siunertaavoq qulakkiissallugu, Kalaallit Nunaanni innuttaasut suliffeqarfeqarfimmit soraarninngorunik aningaasanik atorsinnaasaqarsinnaanerit. Siunertaq tamanna siuarsarniarlugu aalajangerneqarpoq, ileqqaakkat nassatarigaat, aningaasat soraarnerussutisiaqalernissamut ileqqaakkanut kontumut ikineqartut, isertitat akileraaruteqaataasussaasut naatsorsorneranni ilanngaataasinnaanerat. Ilanngullugu § 47 f-imi aalajangersarneqarpoq, soraarnerussutisiaqalernissaq siunertarlugu ileqqaakkanit piginnittumut akiliineq, ullormi piginnittup 60-inik ukioqalernerani aatsaat tunniunneqarsinnaasut, ukiut appasinnerusut akileraartarnermut oqartussaasunit akuerineqarsimangippata.

Malittarisassaq pingaarutilik tamanna aalajangersakkami § 47 h, imm. 2-mi ilalernerqartoq, tassani piginnittup imaluunniit salliutitat soraarnerussutisiaqalernissaq siunertarlugu ileqqaakkani aningaasanut pisinnaatitaaffii akiligassaqarfiannit eqqartuussivikkoortitsissutaasinnaanngimmata. Akiliisinnaajunnaarnermili piunasaqaatigineqarsinnaavoq, aningaasat, ulloq killiliussaq sioqqullugu ukiut kingulliit 3-t iluanni ileqqaakkanut aningaasaliissutitut akiliutigineqarsimasut, pineqartullu pisussutai eqqarsaatigalugit aningaasat taakku naleqqutinngitsumik annertuallaartutut isigineqartariaqartut, akiliisinnaajunnaarnermi akiliutigineqassasut, akiliivallaarsimaneq pineqarpat.

Tamatuma malitsigaa, ileqqaakkat piffissap soraarninngorfissap tungaanut qulakkeerniarneqartarnerat, ileqqaakkallu taamaasillutik akiligassaqaarfinit toqqorterinertut atorneqassanngitsut.

Malittarisassamit pingaarnermi tassannga § 47 e-mi aalajangersakkamik aalajangersaasoqarpoq, saneqqussinertut atuuttumik. Aalajangersakkap siunertaraa, soraarnerussutisiaqarnissaq siunertaralugu ileqqaakkanik piginnittup aktiaatit imaluunniit pigisat nalillit allat, soraarnerussutisiaqarnissaq siunertaralugu ileqqaakkanit aningaasanit pisiasat tiguppagit, piginnittup aningaaserivimmuut nalunaarutigissavaa pigisat nalillit tigusat nalingat kiisalu nalinga soraarnerussutisiaqarnermut ileqqaakkanut kontumut akiliutigissallugu. Aktiaatit il.il. tigusat nalingat aningaasat akiliutaasut sinnerpagu, assigiinngissut § 46, imm. 1-imi aalajangersagaq malillugu akileraarutigineqassapput.

Aalajangersakkap periarfissippaa, inuk, nikerartumik isertitalik, ”ukiuni pitsaasuni” malunnartunik ileqqaaruteqarsinnaassasoq, taamaasilluni akileraarutit killeqarlutik, ukiunili isertitakiffiunerusuni soraarnerussutisiaqalernissamut ileqqaakkanut kontumit aningaasanik tiguisinnaallutik. Tamatuma kingorna kinguneqaataassaaq, pigisamik nalilimmik tunisinerup kingorna soraarnerussutisiaqalernissamut ileqqaakkanut kontumi sinneruttut aningaasat nalinga sinnerlugu aningaasanik aningaasarsianik akileraarutitik akiliisoqassasoq.

Aalajangersagaq tamanna siunertarinngisamik atorneqarlunissamik periarfissiisinnasutut isigineqartariaqarpoq, akileraarut ukiunut sorlernulluunniit kingusinnerusunut kinguartinneqarsinnaammat, aalajangersakkattaq tunngaviusumik malittarisassamut pingaarnermut, soraarnerussutisiaqalernissamut ileqqaakkanik piginnittup 60-iliiguni aatsaat aningaasanik tiguisinnaaneranut akerliuvoq.

Aalajangersagaq taamaattumik ima allanngortinneqassasoq siunnersuutigineqarpoq, aningaasat soraarnerussutisiaqalernissamut ileqqaakkanut kontumiiginnasasut imaluunniit pigisat nalillit toqqorsivianni tassunga atasumiiginnasasut. Soraarnerussutisiaqalernissamut kontumik piginnittoq ingerlatseqatigiiffimmi aalajangersimasumi aktiaatinik pisisimappat, piginnittup aktiaatit taakku tunissallugit aalajangersinnaavoq, ass. piginnittup nalilerpagu, børsimi naliusoq atuuttoq pillugu tunisineq iluaqutaasoq. Tunisinermilli isertitat soraarnerussutisiaqalernissamut ileqqaakkanut kontumut nuutsinneqassapput, tassanngaanniik pigisanut nalilinnut allanut aningaasaliissutaaqqissinnaallutik. Taama tunisinermi pitsaasumi naliusup ineriartornera pissutigalugu ikisinernut killiliussamik 20 procentiusumik qaangiisoqanngilaq. Kisianni ileqqaakkat nalinganik qulakkeerinnittoqartarluni.

Taamaasillutik aamma ileqqaakkat, akiliisitsiniaassutaasinnaanngitsut, aamma ukiut soraarnerussutisiaqarfissat nallinnginneranni piginnittup atorsinnaassanngilai, piginnittulli ileqqaakkanut aningaasaateqarfimmuut tassunga aningaaseriviup neqeroorutigisaanut malittarisassatigut periarfissiissutinut atugassiissutaanut atorsinnaassavai.

Inatsimmi § 47 c-mi allanguut, innuttaasut soraarnerussutisiaqalernissamut toqqorsivimminni ataasiakkaarlutik pigisanik nalilinnik katiterisinnaanngorsitsisoq, soraarnerussutisiaqalernissamut aningaasaateqarfinni soraarnerussutisiaqalernissamut ileqqaakkat aningaasaliissutigisinnaalernerannik taarserneqartup, pisariaqalersippaa toqqorsiviit atasut soraarnerussutisiaqalernissamut aningaasaateqarfinnut nutaanut nuunneqarnissaannut periarfissamik ammaasoqarnissaa. Tamatuma allaffissornikkut aningaasartuutit killilissavai, toqqorsiviit pilersinneqareersut allanut sanilliullugit annikittuinnaassammata.

Taamaattumik inatsisissatut siunnersuummi § 2, imm. 2 aamma 3-mi ikaarsaariarnermi malittarisassamik siunnersuuteqartoqarpoq.

Siunnersuut inatsimmut atuuttumut sanilliullugu	
<i>Oqaasertaa atuuttoq</i>	<i>Siunnersuut</i>
	§ 1
	Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, ilaatigut Inatsisartut inatsisaatigut nr. 2, 26. april 2007-imeersukkut, Inatsisartut inatsisaatigut nr. 3, 30. november 2009-meersukkut, Inatsisartut inatsisaatigut nr. 10, 29. november 2013-imeersukkut, Inatsisartut inatsisaatigut nr. 7, 6. juni 2016-imeersukkut kiisalu kingullermik Inatsisartut inatsisaarigut nr. 22, 28. november 2018-imeersukkut allangortinneqartumi uku allangortinneqarput:
	1. § 34, nr. 20-p kingorna nr. 21-tut ilanngunneqarpoq: “21) Aningaasat Politiets Efterretningstjenestemi immikkut kukkunersiorneqartussaataasut atorlugit akissarsiaritinneqartut.”
	2. § 38-p kingorna ilanngunneqarpoq: ”Kapitali 3 a <i>Sulinermut ilanngaasut”</i>

3. Kapitali 3-mi § 38-p kingorna a ilanngunneqarpoq

”§ **38 a.** Sulinermut ilanngaat qinnuteqaateqarnani inunnut imm. 2-mi pineqartunut akilerneqartarpoq. Sulinermut ilanngaat kapitalimi matumani malittarisassat naapertorlugit naatsorsorneqartarpoq akilerneqarlunilu.

Imm. 2. Inuit uku sulinermut ilanngaammik pisinnaatitaapput:

- 1) § 1, imm. 1-2 naapertorlugit akileraartussaataasut, kiisalu marloqiusamik akileraartarneq pillugu isumaqatigiisummi aalajangersakkat malillugit naalagaaffimmi allami, Danmarkimi imaluunniit Savalimmiuni angerlarsimaffeqartutut isigineqanngitsut, aamma
- 2) § 72 a, imm. 1 imaluunniit § 72 b, imm. 1 naapertorlugit ilanngaaseeqqaalluni akileraartinneqartut.

§ **38 b.** Sulinermut ilanngaatip ukiumut annertussusigissavaa:

- 1) Sulinermut ilanngaat aningaasarsianut tunngaviup § 21 malillugu ilanngaat aalajangersimasoq ilanngullugu § 67 malillugu inummur ilanngaatip qaangernerani 7,0 procentimik annertussuseqarpoq. Kisiannili sulinermut ilanngaatip ukiumi aningaasarsiorfiusumi ataatsimi 9.800 kr. qaangersinnaanngilaa.
- 2) Sulinermut ilanngaat aningaasarsianut tunngaviup ukiumut ataatsimut 386.000 kr.-nik qaangerneranni 4,5 procentimik annikillisinneqassaaq.

Imm. 2. Imm. 1-imi aningaasat annertussusaat aningaasarsianullu tunngaviup killingi ukiumut aningaasarsiorfiusumut 2020-mut atuupput. Aningaasat annertussusaat isertitanullu tunngaviup killingi ukiumut

aningaasaqarfiusumut pineqartumut akit aaqqinnerannut procenti atorlugu 1. januar aaqqinneqartassapput, tak. Procenti aaqqiissutissaq aamma maannakkorpiaq aningaasarsiat pillugit Inatsisartut inatsisaat.

§ 38 c. Sulinermut ilanngaammut aningaasarsianut tunngaviit tassaapput isertitat A-t aamma B-t katillugit, aningaasat § 41, imm. 2 naapertorlugu aningaasarsianut akileraarutaasussanut ilanngunneqanngitsunut ilanngullugit.

Imm. 2. Aningaasarsianut tunngavinnut ilaapput aktiaatinit iluanaarutit Kalaallit Nunaanni ingerlatseqatigiiffinnit pissarsiat. Iluanaarutit pissarsiarineqartut iluanaarutinit akileraarutit sioqqullugit naatsorsorneqassapput.

§ 38 d. Aningaasarsianut tunngaviit naatsorsornerini ilanngunneqassanngillat tapiissutit soraarnerussutisiaqarnissamut aaqqissuussinermit pinngitsoorani ilaanissaq pillugu Inatsisartut inatsisaanni § 4, imm. 1-2-mi taaneqartut, kisiannili ilanngunneqassapput aalajangersakkami imm. 1, nr. 1-3-mi taaneqartut.

Imm. 2. Aningaasarsianut tunngavimmik naatsorsuinermit aamma aningaasarsianit isertitat il.il. §§ 70 aamma 71-imi ilaasut ilanngunneqassanngillat.

Naatsorsuineq akiliinerlu

§ 38 e. Akileraartarnermut ingerlatsiviup aningaasarsianut tunngavik, tak. § 38 c-38 d, aamma sulinermut ilanngaasat 1. september nallertinnagu naatsorsortassavai.

Aningaasarsianut tunngavik minusimiippat, sulinermut ilanngaasat 0 kr.-ussaaq.

Sulinermut ilanngaasat nalinga akileraaruserinermik ingerlatsineq pillugu

	<p>inatsisartut Inatsisaanni § 25 naapertorlugu akileraarutit sippuutaat akilerneqartassapput suliarineqarlutillu. Kisiannili akileraaruserinermik ingerlatsineq pillugu Inatsisartut inatsisaanni § 25, imm. 2 malillugu taarsiisoqartassanngilaq.</p> <p><i>Imm. 2.</i> Akileraartarnermut ingerlatsiviup sulinermt ilanngaatip ukiumoortumik naatsorsornera nassiuttassavaa.”</p>
<p>§ 47 c. Soraarnerussutisiaqarnissaq siunertaralugu ileqqaakkani aningaasat nioqqutissanut aningaasaliissutaasinnaapput taamaallaat, aningaasaliissutit tamarmiusut annaanissaanut aarlerinaat annikitsuaraararsuartut isigineqarpat, kiisalu nioqqutissaq paasiuminaatsuunngippat (aarlerinaat qorsuk) imaluunniit nioqqutissanut, aningaasaliissutit tamarmik ilaannakulluunniit annaanissaanut aarlerinaatilimmut, kiisalu nioqqutissat paasiuminaatsuunngippat (aarlerinassuseq sungaartoq). Ileqqaakkani tamarmiusuni aarlerinaammut qorsuusumut 100 procentimik aningaasaliisoqarsinnaavoq.</p> <p>Ileqqaakkani tamarmiusuni aarlerinaammut sungaartuusumut annertunerpaamik aningaasaliisoqarsinnaavoq:</p> <p>a) Inunnut 35 ataallugit ukiulinnut 100 pct. b) Inunnut 35-44-llu akornanni ukiulinnut 90 pct. c) Inunnut 45-49-llu akornanni ukiulinnut 80 pct. d) Inunnut 50-59-illu akornanni ukiulinnut 70 pct. e) Inunnut 60-64-illu akornanni ukiulinnut 50 pct. f) Inunnut 65-69-illu akornanni ukiulinnut 30 pct. g) Inunnut 69-it sinnerlugit ukiulinnut 10 pct.</p> <p><i>Imm. 2.</i> Aktiat imaluunniit aningaasaliiffissat akuleriiaat qaammatip</p>	<p>” § 47 c. Soraarnerussutisiaqarnissaq siunertaralugu ileqqaakkanik aningaaserivimmiittunik piginnittup aalajangersinnaavaa, aningaasat ileqqaakkat tamakkiisumik imaluunniit ilaannakortumik soraarnerussutisiaqalernissamut aningaasaateqarfinnut, aningaaserivimmit neqeroorutaasunut inissineqassanersut.</p> <p>Soraarnerussutisiaqarnissamut ileqqaakkanik piginnittup kapitali manna malillugu ileqqaarinermi pigisani nalilinni, soraarnerussutisiaqalernissamut aningaasaateqarfimmu ilaanngitsuni aningaasaliisinnaanngilaq.</p> <p><i>Imm. 2.</i> Aningaaserivik soraarnerussutisiaqalernissamut aningaasaateqarfinnik arlalinnik pilersitsisinnaavoq, soraarnerussutisiaqalernissamut ileqqaartunut neqeroorutigineqarsinnaasunik, taamaasillutik aningaasaataat soqutigisaat sapinngisamik pitsaanerpaamik aningaasaliissutigineqartassallutik.</p> <p>Taamaattumik aningaaseriviup aningaasaliinerit aarlerinaatai paasisinnaassavaat, aqussinnaassavaat, nakkutigisinnaassavaat, misissorsinnaassavaat nalunaarutigisinnaassallugillu kiisalu ingerlatseqatigiiffiup namminermit aarlerinaataani ataatsimut naliliinermit taakku eqqarsaatigisassallugit. Matuma</p>

<p>naanerani amerlassusiisa amerlanerpaaffissaq imm. 1-imi taaneqartoq qaangersimappassuk oqimaaqatigiissaareqqittoqassaaq, taamaattorli tak imm. 3.</p> <p><i>Imm. 3.</i> Soraarnerussutisiaqarnissaq siunertaralugu ileqqaakkanut, inummit ulloq 31. december suli 63-inik ukioqalersimanngitsumit pigineqartunut ukiuni aningaasarsiorfinni kingullerni pingasuni akiliisoqarsimappat oqimaaqatigiissaareqqinneq pisinnaavoq, aktiat imaluunniit aningaasaliiffissat akuleriiaat pigineqatut annerpaaffissamit imm. 1-imi taaneqartumit minnerulernissaat tikillugu aktianik imaluunniit aningaasaliiffissanik akuleriiaanik pisingginnikkut.</p>	<p>saniatigut aningaaserivik pigisanut nalilinnut aningaasaliiffigineqartunut naleqquttumik paasisimasaqassaaq, soorlu qaqagukkulluunniit aningaasaliinernik aarlerinaatinut misissortuaannassasoq. Naggataatigut aningaaseriviup ukkatarissavaa ataatsimut pigisat nalillit qularnaatsuunerat, pitsaassusaat, akiliisinnaassusaat aamma imminut akilersinnaassusaat sullissat aningaasaataannik aningaasaliinermi.</p> <p><i>Imm. 3.</i> Aningaaserivik ileqqaarnermut aningaasaateqarfinnik pilersitsisinnaavoq, sullitamut neqeroorutigineqarsinnaasunik, tassani piumasaqaataavoq, aningaaserivik taannaassammat soraarnerussutisiaqalernissamut aningaasaatit sumut pigisanut nalilinnut inissinneqassanersut aalajangiisussaaq. Aningaaseriviup taamaalilluni toqqissisimanartumik isumannaatsuuneq, aningaasat nalingat attatiinnarnissaat kiisalu sapinngisamik annertunerpaamik iluanaaruteqarnissaq anguniassavaa.</p> <p><i>Imm. 4.</i> Aningaaserivik ileqqaarnermut aningaasaateqarfinnik arlalinnik sullitanut neqerooruteqarsinnaavoq, tassani sullitat nammineq ileqqaakkatik pigisanut nalilinnut qanoq ittunut inissinneqassanersut aalajangiinissamut periarfissaqarlutik. Aningaasaateqarfiit taakku aningaasaateqarfimmit, aningaaseriviup aningaasaliinermi aalajangigaannit allaanerusumik aarlerinaateqarsinnaapput. Piumasaqaataavorli, aningaaserivik pigisanik nalilinnik imaluunniit pigisat nalillit suussusaanik arlalinnik, nioqqutissap suussusaa paasiniassallugu ajornakusoortuunngitsunik, imaluunniit nioqqutissanik aningaasanik aningaasaliissutaasunik tamakkiisumik imaluunniit ilaannakortumik</p>
--	---

	<p>annaasaqaataanissaanut aarlerinaateqartunik, nioqutissalli suussusaanik paasiniassallugu ajornakusoortuunngitsunik toqqaassasoq.</p> <p><i>Imm. 5.</i> Aningaaserivik ileqqaarnermut aningaasaateqarfinnik ilusilersuinermi, sullitat toqqaanissamut kiffaangissuseqarfigisaanni, § 47 d, imm. 1 aamma 2 malissavaa, aningaasaateqarfiullu matuma saniatigut aarlerinaatinik siaruaaneq annertoq anguniassavaa.”</p>
<p>§ 47 e. Soraarnerussutisiaqarnissaq siunertaralugu ileqqaakkanik piginnittup aktiat pigisalluunniit allat, aningaasat soraarnerussutisiaqarnissaq siunertaralugu ileqqaakkaneersut atorlugit pisiarineqarsimasut tigugunigit, piginnittup pigisap tiguneqartup nalinga aningaaserivimmuut nalunaarutigissavaa, nalingalu soraarnerussutisiaqarnissaq siunertaralugu uninngasuutit kontuannut akilissallugu. Aktiat tiguneqartut il.il. nalingisa akiliinerit qaangerpagit, assigiinngissut § 46, imm. 1-imi aalajangersagaq malillugu akileraaruserneqassaaq.</p>	<p>5. § 47 e, imm. 1, ima oqaasertalerneqassaaq: ”Soraarnerussutisiaqarnissaq siunertaralugu ileqqaakkanik piginnittoq pigisanik nalilinnik toqqorsivinniittunik, ileqqaarnermut kontumut atassuteqartunik pisisinnaallunilu tunisaqarsinnaavoq, kisiannili aningaasanik pigisanik nalilinnik tunisinikkut pissarsianik ileqqaarnermut kontumeersunik tiguisinnaanani. Aningaasat taakku aningaasaatitut uninngaannassapput imaluunniit toqqorsivimmi atasumi aningaasaliissutaqqillutik, tak. § 41, imm. 3, aamma § 46 aningaasanik ileqqaakkanik akileraarutaasussanik tigusineq, piginnittoq 60-inik ukioqalersinnagu.”</p>
<p>§ 88, imm. 2, oqaaseqatigiit siulliit <i>Imm. 2.</i> Iluanaarutininik tunniussinissamik pisassanngortitsinermilluunniit aalajangiinerup, nalunaaqqusinermiluunniit nalunaarnissamut piffissaliunneqartup naanerata ulluata qaammataata tulliani kingusinnerpaamik ullut qulinganni, ingerlatseqatigiiffik Naalakkersuisut aalajangigaannik iluseq atorlugu aalajangiineq pillugu paasissutissanik nalunaaruteqassaaq.</p>	<p>6. § 88, imm. 2, oqaaseqatigiit siulliit ima oqaasertaqarput: ”Iluanaarutininik tunniussinissamik pisassanngortitsinermilluunniit aalajangiinerup, nalunaaqqusinermiluunniit nalunaarnissamut piffissaliunneqartup naanerata ulluata qaammataata tulliani kingusinnerpaamik ullut qulinganni, ingerlatseqatigiiffik Naalakkersuisut aalajangigaannik iluseq atorlugu aalajangiineq pillugu pissarsisullu pillugit paasissutissanik nalunaaruteqassaaq.”</p>
	<p>§ 2</p>

	<p>Inatsisartut inatsisaat 1. januar 2020 atuutilersinneqarpoq, kisiannili tak. imm. 3.</p> <p><i>Imm. 2.</i> Sulinermut ilanngaat ukiumit aningaasarsiorfiusumit 2020-mit § 1, nr. 2-3-mi aalajangersakkat malillugit siullermeerluni naatsorsorneqassaaq.</p> <p><i>Imm. 3.</i> Naalakkersuisut § 1, nr. 1-ip ulloq atuutilerfissaanik nalunaarusiornikkut aalajangiinissamik piginnaatinneqarput.</p> <p><i>Imm. 4.</i> Soraarnerussutisiaqalernissaq siunertaralugu ileqqaakkanik piginnittoq, Aningaasarsianik akileraarutit pillugit Inatsisartut inatsisaata nr. 12, 2. november 2006-imeersup allangortinneqarnera pillugu Inatsisartut inatsisaani nr. 29, 28. november 2016-imeersumi § 47 c naapertorlugu pigisanik nalilinnik aningaasaliisimasoq, piffissaq qaammatit 24-t iluanni pigisat nalillit soraarnerussutisiaqarnermut aningaasaateqarfimmut, aningaaserivimmit neqeroorutigineqartumut nuussavai, pigisat nalillit aalajangersakkat soraarnerussutisiaqarnermut aningaasaateqarfimmut atuuttut naammassippagit.</p> <p><i>Imm. 5.</i> Pigisat nalillit, soraarnerussutisiaqarnissaq siunertaralugu ileqqaakkanik piginnittumit toqqorsivimmut ilineqartut, soraarnerussutisiaqarnermut aningaasaateqarfimmut, aningaaserivimmit neqeroorutigineqartumut piumasaaqatinik naammassinninngitsut, uuma Inatsisartut inatsisaata atuutilerneranit piffissaq qaammatit 24-t qaangiutsinnagit, tunineqassapput kiisalu tunisinermi pissarsiat soraarnerussutisiaqarnermut aningaasaateqarfimmut, aningaaserivimmit neqeroorutigineqartumut inissinneqassallutik.</p>
--	--

3. Aningaasaqarnikkut allaffissornikkullu pisortanut kingunerisassat

3.1. Sulinermit ilanngaammik eqqussineq

Sulinermit ilanngaatiq aningaasaqarnikkut kingunissai imatut naatsorsorneqarsinnaapput:

Ukiumoortumik aningaasaqarnikkut kingunissat AI 2021-mit kingornalu

Sulinermit ilanngaat -107 mio. kr.

Annikillisaaneq 23,5 mio. kr.

Nikerarnermi sunniutinut 38,5-init 33,5-inut mio. kr.

Katillugit -50 –nit 45-nut mio. kr.

Sulinermit ilanngaammik eqqussinermit erngertumik iluanaarutitigut appariaatissaq -107 mio. kr.-t missaanniissasoq naatsorsorneqarpoq. Sulinermit ilanngaammik apparsaaneq 23,5 mio. kr.-t missaannik iluanaarutaassasoq naatsorsuutigineqarpoq, taamaasilluni iluanaarutitigut toqqaannartumik appariarneq katillugu 83,5 mio. kr.-ussaaq.

Nalilerneqarpoq, sulinermit ilanngaammik eqqussinermit atatillugu nikerartumik sunniuteqassasoq. Sunniutit taakku sulinermit sunniutaassasut naatsorsuutigineqarput, tassani innuttaasut sulinerunissaq toqqassagaat, akileraarutitigut isertitat qaffariarnerannik kiisalu pisortat isumaginninnikkut aningaasartuutaasa annikillinerannik kinguneqartumik. Sulinermit ilanngaatiq annikilliartuaartinnerata annertussusaanni, annertunerusumik sulinissamut kajumissuseqalersitsineq pitsaanngitsumik killeqarpoq, tamatumalu suliffissaqarneq sunnertussaavaa, taamaalillunilu siunnersuutip ineriartortumik sunniinera pitsaasuunani. Tamatuma saniatigut innuttaasut aningaasat atoriaannaasaasa qaffariarnerat sunniutaassaaq, taamaasilluni atuineq qaffariassalluni. Tamanna ilaatigut nunatta karsianut annertunerusumik iluanaarutaassaaq, assersuutigalugu eqqussinermit akitsuutitigut aamma suliffeqarfiit akileraarutaasa qaffannerisigut il.il. ilaatigut atugassanik niuerfimmit. Ataatsimut isigalugu nikerartumik sunniutit 38,5-33,5 mio. kr.-t missaanni iluanaarutaassasut missiliorneqarpoq. Nikerartumik sunniutissat missingersornerinut atatillugu annertunerusumik qularnartoqarpoq. Assersuutigalugu sulinermit sunniutaasumut apeqqutaapput atorfiit inuttaqanngitsut il.il. ilaatigut taakkununga apeqqutaallutik inuiaqatigiinni pissutsit.

Siunnersuut katillugu 45-50 mio. kr.-t missaanni iluanaarutitigut appariarnermik nassataqassasoq missiliorneqarpoq.

Akileraartarnerup aaqqussuussaananerata ilusilersugaanera naapertorlugu inummut akileraarutinit, kommunit ataatsimut akileraarutaannit kiisalu suliffeqarfiit iluanaarutinillu akileraarutinit isertitat 75 %-iisa missaat ullumikkut kommunitut tuttarput. Nunatta karsia taamaasilluni akileraarutinit isertitat 25 %-iisa missaannai tigusarpai.

Siunnersuutip inuup akileraarutaannit iluanaarutit appariarnerannik nassataqartussaammat, siunnersuut kommunit akileraarutinit iluanaarutaannut sunniuteqassaaq. Paarlattuanik suliffeqarnermik sunniutummit kommunit aamma isumaginninnikkut ikiorsiissutitigut aningaasartuutikinnerulissapput kiisalu suliffeqarfiit kiisalu iluanaarutinit akileraarutinit

isertitaqarnerulissallutik. Tunngavik DUT malillugu kommunit taamaasillutik ataatsimoortumik tapiissutitigut allannguutit ilanngaaseereerluni sunniutaannik taarsiivigineqassapput.

Akileraarutininik aqutsinermut sunniutissat

Naatsorsuutigineqarpoq siunnersuut allaffissornikkut sulisussanik nutaanik 2-nik nutaanik pisariaqalersitsissasoq. Taakku pingaarnertut suliarissavaat sulisitsisunik nakkutilliineq kiisalu innuttaasunit sulisitsisunillu sullissineq aamma saaffiginnissutinik suliaqarneq.

Ataatsimut akissarsianut aamma ingerlatsisunut akiliutissat aningaasartuutaanerusussat ukiumut 1,2 mio. kr.-ussasut missiliorneqarput kiisalu ukiumi siullermi IT-kkut aaqqiissutissanik il.il. ineriartortitsinermut ataasiarluni aningaasartuutissat 3-5 mio. kr.-ussasut missiliorneqarlutik.

3.2. Aningaasat Politiets Efterretningstjenestemi immikkut kukkunersiorneqartussaataasut atorlugit akissarsiaritinneqartut

Nalilerneqarpoq, siunnersuut aningaasaqarneq eqqarsaatigalugu pisortanut annikinnerusumik sunniuteqassasoq, tassani naatsorsuutigineqarmat inunnut Kalaallit Nunaanni akileraartussaataasunut, akiliinerit annertussusaat amerlassusaallu killeqassasut. Kisiannili politiit kisimik ilisimassavaat akiliinerit katillugit qanoq annertutigissanersut, taamatullu tunniussat annertussusaat paasiniaanermik suliaqarnerup il.il. annertussusaa ilutigalugu piffissap ingerlanerani nikerarsinnaalluni.

3.3. Soraarnerussutisiliaqalernissaq siunertaralugu ileqqaakkat

Siunnersuut pisortanut aningaasaqarnikkut kinguneqassanngitsoq nalilerneqanngilaq. Siunnersuut annikitsumik immikkoortumi nakkutiginninnermi akileraartarnermut aqutsisoqarfimmi unammillernartunik annikillisaassaaq.

4. Aningaasaqarnikkut allaffissornikkullu inuussutissarsiornermut kingunerisassat

Sulinermit ilanngaatic atuuksinneqalernerata kingunerisaanik, inuussutissarsiorlut killilimmik annertussuseqartumik ukiumoortumik nassuiaatinik nassuiaaffiulluarnerusunik nassiussisarnissamut pisussaaffilerneqassapput. Paasissutissat, akileraaruserinermik ingerlatsiviup tunngaviusumik isertitani isertitat qanoq ittuussusaannik immikkoortitsisinaanissaanut pingaaruteqarput.

Ilanngullugu suliffeqarfimmut pisussaaffiliisoqassaaq, inuit kikkut iluanaarutininik tunineqassanersut nalunaarusiornissamut. Tamatuma nassataraa Kalaallit Nunaanni suliffeqarfiit allaffissornikkut annertunerusumik suliassaqalernissaat.

Isertitakitsunut aamma akunnattumik isertitaqartartunut akileraarutitigut oqilisaassinermik siunnersuut ataatsimut isigalugu kinguneqassaaq, tamannalu qaffasinnerusumik aningasani atugassaqalersitsissasoq atuinerulersitsissasorlu naatsorsuutigineqarpoq.

Tamatuma saniatigut naatsorsuutigineqanngilaq siunnersuut inuussutissarsiornermut allaffissornikkut imaluunniit aningaasaqarnikkut allanik annertuunik sunniuteqassasoq.

Soraarnerussutisiaqalernissaq siunertaralugu ileqqaakkat

Siunnersuutip aningaaseriviit, soraarnerussutisiaqalernissaq siunertaralugu ileqqaarinermik sullitaminnut neqeroorusuttut, peqquai soraarnerussutisiaqalernissamut aningaasaateqarfinnik pilersitsissasut imaluunniit tamanna pillugu avataanit pisiortorfiusunik isumaqatigiissuteqassasut. Suliassaq aningaaserivinnit suliarineqareertoq pineqarpoq taamaattumillu naatsorsuutigineqanngilaq, siunnersuut aningaaseriviit immikkoortumi suliaanni imaluunniit aningaasartuutaanni malunnartumik qaffatsitsissasoq.

Siunissaq ungasinnerusooq eqqarsaatigalugu siunnersuut aningaaseriviit sullitaminnut malittarisassanik atuuttunik, matuma ataani pingaartumik soraarnerussutisiaqalernissamut ukiut qanilliarturneri ilutigalugit aningaasaliinernik ingerlaavartumik oqimaqatigiissaareqqinneq pillugu piumasaqaataasunik ilitsersuisarnermik suliaqarnerit annikillitsissasoq naatsorsuutigineqarpoq.

Ataatsimut siunnersuut nalilerneqarpoq annikinnerusumik aningaaseriviit soraarnerussutisiaqalernissamut aqqissuussinernut aningaasartuutaat annikillissagaat.

5. Avatangiisinut, pinngortitamut inuillu peqqissusiannut kingunerisassat

Siunnersuut avatangiisinut, pinngortitamut aamma inuit peqqissusiannut sunniuteqassanngilaq.

6. Innuttaasunut kingunerisassat

Siunnersuutip nassatarissavaa, innuttaasut inummut nalinginnaasumillu ilanngaatip annertussusaanit (2019-imi 58.000 kr.-nit) 606.000 kr.-t tungaannut sulinermi isertitaqartut isertitatigut siuariarnissaat.

Tamatumani inuup aningaasarsiai kommunilu akileraarfik apeqqutaallutik inuup ataatsip aningaasat atorsinnaasai 4.300 kr. tikillugit annertusissapput.

Akissarsiat immikkut kukkunersiuinerit ataanni Politiets Efterretningstjenestemit akissarsiaritinneqartut akileraaruteqaataajunnaarnissaat

Siunnersuutip nassatarissavaa Politiets Efterretningstjenestep suleqatiginerani innuttaasup isertuunneqarnissaa kiisalu suliamut akissarsinissaa.

Soraarnerussutisiaqalernissaq siunertaralugu ileqqaakkat

Siunnersuut innuttaasut aningaasaliinissamut kiffaangissuseqarnerannut killilimmik annertussusilimmik killiliissaaq. Tamanna aningaaseriviit pigisat nalillit sorliit aningaasaliiffigineqarsinnaanersut aalajangiisussannortinneqarnerannik malittaavoq. Taarsigullugu innuttaasut piumasaqarfigineqarunnaassapput, ileqqaartut ukiui malillugit aningaasaliissutit aalajangersimasumik annertussusilimmik aarlerinaatilinni immikkoortumi sungaartumiittuni pigisanik nalilinnik annertunerpaamik inissisimasuuteqarnissamut.

Ataatsimut siunnersuummik, malittarisassat atuuttut periarfissiinerannut sanilliullugu innuttaasut ileqqaakkaminnik annertunerusumik iluanaaruteqarsinnaaneranngit periarfissinneqassasut naatsorsuutigineqarpoq peqatigitillugulu, soraarnerussutisiaqalernissamut ileqqaakkat nalingata attatiinnarneqarnissaanut naammaginantumik qulakkeerinnittoqassalluni.

7. Malunnaatilimmik kingunerisassat allat

Siunnersuut allanik kinguneqassasoq naatsorsuutigineqanngilaq.

8. Oqartussaasunik kattuffinnillu il.il. tusarniaaneq

Sulinermut ilanngaataq ilaatigineqarsinnaaneranngit aamma, akissarsiat Politiets Efterretningstjenestemik immikkut kukkunersuinermut ilaasut akileraaruserneqartannginnissaannik atuutilersitsinissamik siunnersuut piffissami 30. april 2019-imiit 4. juni 2019-imut tusarniutigineqarpoq.

Siunnersuutittaasut piffissami tassani Naalakkersuisut tusarniaanermut nittartakkami www.naalakkersuisut.gl-imi avammut saqqummiunneqarpoq.

Soraarnerussutisiaqalernissaq pillugu ileqqaakkat pillugit siunnersuut piffissami 1. julimit 24. julimut 2019 tusarniutigineqarpoq. Siunnersuut Naalakkersuisut uani www.naalakkersuisut.gl tusarniaanermut nittartagaanni avammut saqqummiunneqarpoq.

Sulinermut ilanngaammik aamma akissarsiat Politiets Efterretningstjenestimit akilerneqartut immikkut kukkunersiorneqartussaataasut akileraaruserneqartannginnissaannik atuutilersitsinissaq pillugu siunnersuut tusarniaaffigineqartunut ukununga nassiuunneqarpoq:

SIK, IMAK, ASG, PPK, AK, GE, KNAPK, Deloitte, Grønlands Revisionskontor, BK Revision, EY Grønland, BDO, SISA, GrønlandsBanken, Banknordik, Avannaata Kommunia, Kommuneqarfik Sermersooq, Kommune Qeqertalik, Qeqqata Kommunia, Kommune Kujalleq, Siulittaasup Naalakkersuisoqarfia, Inuussutissarsiornermut Nukissiuuteqarnermullu Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Pinngortitamut Avatangiisinullu Naalakkersuisoqarfik, Ineqarnermut Attaveqatigiinnermullu Naalakkersuisoqarfik, Ilinniartitaanermut, Kultureqarnermut, Ilageeqarnermullu Departementet for Uddannelse, Kultur, Kirke, Nunanut Allanut

Naalackersuisoqarfik, Departementet for Peqqissutsimut, Isumaginninnermut Inatsisinillu Atuutsitsinnermut Naalackersuisoqarfik, Isumaginninnermut Inatsisinillu Atuutsitsinnermut Naalackersuisoqarfik.

Tusarniaanerni piffissarititat naanerani SIK-mit, IMAK-imit, Kommune Kujallermit, SISA-mit, Aningaasaqarnermut Sulisoqarnermullu Aqutsiveqarfimmit aamma Peqqissutsimut, Isumaginninnermut Inatsisinillu Atuutsitsinnermut Naalackersuisoqarfimmit tusarniaanermi akissutinik tigusooqartoq. Oqaaseqaatit tiguneqartut nalinginnaasumik naqinnilerlugit naalisarlugit ataani issuarneqarput, Naalackersuisullu oqaaseqaataat *uingasunnorlugit* allanneqarlutik.

SIK

SIK-p neriuutigaa sulinnermut ilanngaati atuutilersinnerata kingorna sulerusunneq annertunerulissasoq, eqqumaffigeqqaali tamanna illoqarfinni suliffissaaleqiffiusuni sunniuteqangaarnaviangitsaq.

Oqaaseqaat tamanut tunngasunik oqaaseqaataammat allannguutinik kinguneqanngilaq.

SIK aamma isumaqarpoq sunniuteqarnerussappat sulinnermut sulinnermut ilanngaat qaammammut 800 kronimit qaffasinnerusariaqaraluartoq. Taamaattoq SIK-p neriuutigaa ukiumi tulluuttutni taanna qaffakkiartortinneqarumaartoq.

Sulinnermut ilanngaati annertussusaa partiit 2019-imit Aningaasanut inatsimmik isumaqatigiissuteqartut sulinnermut ilanngaati atulersinneranut aningaasat atugassarititaat malillugu aalajangerneqarpoq. Siunnersuut inunnut akunnattumik isertitaqartartunut suliffeqartunut annikinnerusumik sulili malunnaataasumik annikinnerusumik akileraartarnermik kinguneqassaaq, ilimagineqarporlu tamanna suliffeqarusunnermut tapersiilluassasoq. Qaffasinnerusumik ilanngaateqarneq tunngaviatigut pitsaanerussaaq, kisiannili aningaasanut inatsit oqimaaqatigiittussaammat aningaasaliissutinik pisariaqartunik pissarsisinnaaneq apeqqutaassalluni.

IMAK

IMAK-ip suliniut sulerusussuseqarnerulersitsisussaq tunngaviatigut taperserpaq.

IMAK-illi siulersuisui isumaqarput inatsisissatut siunnersuut nassiunneqartoq atuisunut piiminangitsorujussuussasoq. IMAK-ip siunnersuummi § 1 tamassuminnga ersarissumik takutitsisoq innersuussutigaa. Akileraartarneq pillugu inatsisit amerlasuunut paasiuminaatsorujussooreerput, tassunga peqatigitillugu nammineq pisinnaatitaaffiit takuniarlugit inatsisit arlallit misissussagaanni amerlanerpaanut paasiuminaatsorujussuannussaaq.

Aalajangersakktat atuuttut tamarmik ataatsimut allannissaannut piffissaq iluatsillugu atorneqassasoq IMAK-p siulersuisuisa sakkortuumik kaammattuutigaat.

Oqaaseqaat tamanut tunngasumik oqaaseqaataammat allannguineramik kinguneqanngilaq. Aningaasarsiat akileraaruserneqartarnerat pillugu inatsimmik nutaamik saqqummiussassamik suliaqarneq annertoorujussuussaaq. Namminersornerullutik Oqartussani inatsisinut nalunaarutit atuutilersinnissaat suliniutigineqarpoq. Akileraartarnerli pillugu inatsisip inatsisinullu allannguutit amerlammata inatsisinut nalunaarutit saqqummiinissamut piffissaq ingerlangaatsiassaaq.

Siunnersuummi § 38-p allanngortinneqarnissaa IMAK-ip aamma inassuteqaatigaa, taamaalilluni inatsit allarlunnaq innersuunneqaannarani aalajangersagarli siunnersuummut ilanngunneqassalluni.

IMAK-ip siunnersuummi § 38 innersuussutiginnuatsiarpa, tassani soraarnerussutisiqaarnissamut aaqqissuussinermut pinngitsoorani ilaanissaq pillugu Inatsisartut inatsisaat. Oqaaseqaat ilanngunneqanngilaq. Isertitanut maannakkut tunngavioereersut aallaavigineqarneranni allaffissornermi pisariillisaanermik kinguneqarpoq. Inatsisini taakkunani marlunni isertitanut tunngavik ataaseq pingaarnertut atorneqarpat inatsisit aappaanni aalajangersakkanut innersuussineq pissusissamisoorpoq. Isertitanut tunngaviup kingusinnerusukkat allanngortinneqarpat inatsimmi ataatsimi allannguisoqarnissaa tassani iluaqutaavoq.

Soraarnerussutisiassanut akiliutit sulinermit ilanngaammut isertitanut tunngavinni ilanngunneqarnissaat IMAK-imi siulersuisut inassuteqaatigaat. Ilanngunneqanngippata taamaallaat pinngitsoorani soraarnerussutisiassanut akiliisarani nammineq soraarnerussutisiassanut ileqqaarutit annertusinissaannut kajumissaataaalluarsinnaavoq. Tamanna inuiaqatigiinnut piffissami sivisunerusumi iluanaarutaasorujussuussaaq.

Oqaaseqaat ilanngunneqanngilaq. Soraarnerussutisiassanut ileqqaakkanut akiliutit isertitanut tunngavimmu ilanngunneqanngippata soraarnerussutisiassanut annertunerusumik ileqqaaruteqarnissamut kajumissaataanissaa ersarinngilaq. Tamanna taamaallaat inunnut isertitaqarnikkut ilanngaataannik ilaatigut soraarnerussutisiassanut akiliutit pissutigalugit appariartortitsiviusunut atuutissaaq. Inummum annertunerusunik isertaqartarnerunerup kingunerisaanik (ilanngaatit appariartortinneqarlutik) ilanngaatinik annertusiartortitsiviusumut akerlianik akiliutit isertitanut tunngaviinut ilanngunneqartarnissaat kajuminnarnerussaaq. Isertitanut tunngaviup soraarnerussutisiqaarnissamut aaqqissuussinermut pinngitsoorani ilaanissaq pillugu Inatsisartut inatsisaanni atorneqartup nassuiaasernerata assingata atornissaa siunnersuummi pingaartinneqarpoq.

GE-p akissarsiat, immikkut kukkunersuinermit Politiets Efterretningstjenestemit akilerneqartut akileraarutaannginnissaannik siunnersuut akuerisinnaavaa.

Ilimagineqarpoq akissarsiat taakku annertussusaat akissarsiat akileraarutaannginnissaat naapertorlugu aalajangerneqartoq.

Oqaaseqaat allannguinermit kinguneqanngilaq. Akissarsiat Politiets Efterretningstjenestimit aalajangerneqartarput.

GE isumaqarpoq siunnersuut sukkulluunniit misissueqqissaarnernik, nalilersuinermit misissuinermilluunniit tunngaveqartoq. GE isumaqarpoq tupinnartuusoq siunnersuummut oqaaseqaatini quppernemi 6-7-imi allaqqammat “ Nikerartumik sunniutissat missingersornerinut atatillugu annertunerusumik qularnartoqarpoq”.

GE-p oqaatigaa “innuttaasut sulinerulerusussasut” siunnersuummi naatsorsuutigineqartoq. GE-p tassunga atatillugu oqaatigaa inuit isertitaqarnerpaat sulinerunerisa qaffasinnerusumik isertitaqartarnej pissutigalugu ilanngaatinik annaasaqarnissaat kingunerissagaa.

GE isumaqarpoq inuit sulinerulernissaannut tamanna akerliusoq. Akissarsiaqartut immikkoortui allat atugassarititat iluanni sulinerulerusussanersut aamma nalorninartorujussuovoq uppernarsarneqarnikuunanilu.

Oqaaseqaatit allannguinermit kinguneqanngillat. Sulinermit ilanngaat aningaasaqarneq pillugu atuakkani allaaserilluakannerneqarnikuuvoq, taamaammallu tamanna pillugu nunani allani arlalinnik misissueqqissaartoqarnikuulluni.

Nunani allani misilittakkat ataatsimut isigalugu pitsaasuupput, sulinernullu ilanngaat immiannut annertuumik aningaasalersornermit kinguneqarnikuulluni. Nunani allani misilittakkat Kalaallit Nunaannut qanoq annertutigisumik misilittagaalissanersut soorunami nalorninartorujussuovoq, tassa Kalaallit Nunaanni pissutsit allaanerummata, assersuutigalugu nunap pissusaanut inuussutissarsiornermilu pissutsinut tunngatillugu. Ilimagineqartariaqarporli innuttaasut aningaasatigut kajumissaarutinut qisuariassasut taamaammallu sunniuteqassasoq.

GE-p oqaatigisaatut eqqorpoq siunnersuut inunnut isertitaqartarnermikkut sulinermit ilanngaammik annikilliliivigineqartunut akileraarutaasa killilimmik annertusinerannik kinguneqassasoq. Siunnersuut taakkununga sulerusussuseqarnerannut pissutsit taamaaginnartillugit ajornerusumik sunniuteqassaaq. Annikilliarortitsineq peerneqarpat siunnersuut aningaasatigut atugassaritineqartut iluaniitinneqassappat sulinermit ilanngaatip tunniunneqarsinnaasup annertussusia annikillisinneqassaaq. Siunnersuutip sunniutai assigiinngiartut ajortut ajunngitsullu siunnersuutip aningaasatigut kingunissaanik tamarmiusunik naatsorsuinermit ilanngunneqarput. Aamma oqaatigineqassaaq inuit

qaffasissumik isertitaqartartut akileraarutaasa annertunerpaaffia katitigaq annikinnerugajuttartoq.

GE-p oqaatigaa ataqatigiinnerup taassuma annertunerusumik sulisoqartarnissaa pisariaqartoq siunnersuummi ilimagineqarnera pingaartuusoq – sulilernissaq sulinerunissarlu pilerinarnerupput. Suliffeqarfimmit pissutsit maannakkutut itsillugit, inuussutissarsiutit immikkoortuisa ilaanni akissarsiat qaffakkiartuinnariaallutik sulisussanik ujartuisoqartoq.

Kalaallit Nunaanni ukiuni kingullerni suliffeqartut imatut annertutigisumik amerleriarnikuupput, tamanna kinguneqarluni, sulisinnaasut akornanni suliffissaaleqisutut nalunaarsorneqarnikut tassaannerusut inuit allamik suliffissarsiortut.

Tamanna sukumiinerusumik uppernarsarsimatinnagu, taamaalilluni sulinermut ilanngaatip atuutilersinnissaanut tunngaviliisinnaasumik inunntut suliffeqartunut sulinerunissamik kajumissaataanaviangilaq.

Inuit suliniuteqarfigineqartuni 2-mut 3-mullu inissinneqarnikut kajumilersinneqalersinnaanersut taamaattoqarpallu qanoq iliorluni kajumilersinneqalissanersut oqartussat ullumikkumut paasisaqarsimanngerannik tamanna taparserneqarpoq. Tamanna GE-p naliliinera malillugu suliffissanik neqeroorutit aalajangersimasut nalilersorsinnaajummalugit tunngaviusumik pisariaqarpoq.

Taamatut nalilersuisoqarsimatinnagu siunnersuutip taamaattup piffissami Kalaallit Nunaata aningaasaqarnerata ajunngilluinnartuunerani saqqummiunneqartup pisariaqartinneqarneranik nalilersuisinnaanissamut tunngavissaqavinngilaq.

Taamaammat ilimanartorujussuuvoq siunnersuummik taamatut ittumik kingunissaanik misissueqqaarani akuersisoqarpat pisortat aningaasaqarneranni sunniutaanik assigiinngiaartunik taaneqareersunik matussuserneqanngitsunik amigartooruteqartitsilertussaassasoq.

Tassunga taarsiullugu ataqatigiissaakkamik suliniuteqartoqartariaqarpoq, Kalaallit Nunaanni suliffeqarfiit piffissami sivitsortumi ujartukkaminnik sulisussarsisinnaanissaat, assersuutigalugu Savalimmiuni periutsip assinganik atuutilersitsinikkut, tassani suliffissaaleqinerup annertussusia apeqqutaatillugu avataanit sulisussarsiornissamut periarfissat pisariillisarneqarnikuullutik.

Aningaasatigut isumalluutit aningaasaqarniarnerup qaffannerani annertusinikut piffissanut kinguariartorfiusussanut Kalaallit Nunaata aningaasaqarnerata patajaallisarneqarnissaanut atorneqassasut.

Soorlu Kalaallit Nunaanni sulisinnaasut ilaat maannakkut suliffeqanngitsut suliffeqarnissamut piareersarneqarnerannut, suliniutit sunniuteqartut atorlugit taamaaliortoqarsinnaavoq.

Taamaammat GE-p inassuteqaatigaa sulinermut ilanngaatt pillugu siunnersuut annertunerusumik annikinnerusumilluunniit pitsaassusilinnik eqqoriaanernik tunngaveqartiinnarnagu sunniutivissaanik uppernarsaasiornissap tungaanut tunuartinneqassasoq.

Soorlu qulaani akissuteqarnermi allaaserineqartoq siunnersuut nunani allani misilittakkanik ataatsimut isigalugu pitsaasunik tunngaveqarpoq. Kalaallit Nunaata nunat allarpassuit annikitsumik suliffissaqarfiusut sanilliunnikuuai. Taamaammat suliniutit suliffeqarnermi peqataanermik annertunerulersitsisut atuutilersinneqarnissaannut tunngavissaqarpoq. Immikkoortoq pillugu atuakkani ataatsimut isigalugu nalilerneqarpoq aningaasaqarnermi kajuummissutit aningaasaqarnerup ingerlalluarnernani sunniuteqarnerusartut, tassa suliffissaqanngitsut suliffissarsinissaat ajornannginnerusarmat. Siunnersuulli una kisimiitinneqarsinnaanngilaq. Naalakkersuisut imminut annertunerusumik pilersorsinnaaneq qulequtaralugu suliniutit Kalaallit Nunaanni suliffissaqarnissamik siuarsaasussat assigiinngiiaartut aallartinnikuuaat. Naalakkersuisut nunani allani misilittakkat aallaavigalugit naliliipput, sulinermut ilanngaatt suliffeqartut amerlisinnissaannut politikikkut sakkuusoq sunniuteqarnerpaat ilaat.

GE siunnersuummut nassuiaatinut nalinginnaasunut imatut oqaaseqaateqarpoq.

Immikkoortumi 2.2 at ”2019-imi inummut sulinernullu ilanngaatt 58.000 kr.-usoq”. Allanguutissatut siunnersuut aatsaat ulloq 1. Januar 2020-imi atuutilersinneqartussaammat suliffeqarnermut ilanngaatt taanna allassallugu kukkunerorpasippoq.

Oqaaseqaatt ilanngunneqarpoq. Inummut aalajangersimasumillu ilanngaatt pineqarput.

Immikkoortoq 2-mi immikkoortut pingajuanni sulinermut ilanngaatt naatsorsorneqarpoq isertitanut tunngaviit 180.400 – 350.400 akornanniitillugit ukiumut 9.600 kr.-nut. Tamanna tunngavigalugu inuup akileraarutit kingorna aningaasat atorsinnaasai 4.128,00 jkr.-nut aalajangerneqarput. Tamanna kukkunerorpasippoq, tassa 9.600,00 kr.-t taaneqartunit akileraarutit 43 %-iutillugit tassarpiaammat 4.128,00 kr. taamaammallu taakkunanga aningaasat atorsinnaasat 5.472,00 kr.-ussagnarput.

Oqaseqaatt ilanngunneqanngilaq. Aningaasanik atorneqarsinnaasuni eqqarsaatigineqarput inuup isertitaasa qaffariaataat. Isertat qaffariaataat akileraarutit sipaarutit assigaatt tassaasut (9.600 kr. x 43 %=) 4.128 kr.

Immikkoortumi tullermi ilimagineqarpoq ”Ilanngaattip annikillisikkiartornera ilanngaammut aningaasartuutit annikinnerulersinnissaannut peqataassaaq. Oqaaseqaatt taanna innuttaasunik uukapaatitsineruvoq. Annikilliartortitsineq siunnersuutip ilagaa, tassani annikillisikkiartortitsineq ilanngaammut aningaasartuutit anikillisinnissaannut

tapersiissanani. Pissuseq taamatut sunniuteqarsinnaasoq ilanngaatigigaanni assigiinngiaareertunut sunniutai uppersarneqarsinnaassagaluarput, taamaattoqanngilarli.

Oqaaseqaat allannguinernek kinguneqanngilaq. Sulinermut ilanngaat annertusiartortitsineq annikillisikkiartortitsinerluunniit atorlugit atuutilersinneqarsinnaavoq. Annikillisikkiartortitsineq pissutsit taamaaginnartillugit annilikkiartortitsinermut imaluunniit ilanngaatip appasinnerusumut aalajangerneranut sanilliullugu nunap karsiata isertitaasa tamarmiusut annikillinerannik kinguneqassaaq. Taamaammat annikilliartortitsinermut tunngavik aamma isertitanut tamarmiusunut suut sunniutaasussatut ilimagineqartut allaaserineqarput. Assigiinngiaartunut sunniutanik nalilersuinermi annikilliartortitsinerup sunniutissai ajortut eqqumaffigineqarput. Aamma siunnersuutip assigiinngiaartunut sunniutissaanik nalilersuinermut tunngavik pillugu GE-p tusarniaanermi akissutaanut akissut qulaaniittoq innersuussutigineqarpoq.

Nassuiaatini qupperneq 7-imi qulaatungaani allaqqavoq: “Assersuutigalugu atorfiit il.il. suut inuttaqannginnerinut sulinerup sunniutai apeqqutaapput, tamassumanilu inuiaqatigiinni aningaasaqarnerup qaffassusia apeqqutaavoq”. Tassunga atatillugu assigiinngiaartunut sunniutissaanut pisariaqartutut sulisut pissarsiarineqarsinnaaneri ilanngunneqarnissaa amigaataavoq.

Oqaaseqaat allannguinernek kinguneqanngilaq. Oqaaseqaat siunnersuummi aningaasaqarnermut sunniutissaanik nalilersuinermut tamanut tunngasumik oqaaseqaatitut isigineqarpoq. Naalakkersuisunit siusinnerusukkut oqaatigineqareersutut naliliipput sulinermut ilanngaat aningaasarsiornikkut ingerlalluortoqarnerani sunniuteqarnerpaajusarpoq.

Kalaallit Nunaanni sulisorineqarsinnaasut tassaassapput sulinissamut piareersimannigitsut suliffeqarnerullu avataaniittut, tassanilu sulinermut ilanngaatip suliffeqalernissaq sunningaarnaviannigilaa. Siunnersuummulli nassuiaatini nalinginnaasuni allaaserineqartutut, pingaartumik annikitsunik akunnattunillu isertitaqartartut suliffillit isumaginninnermi ikiuutit ikiuutit il.il. appariartornerat pissutigalugu annertuumik katitikkamik akileraartinneqartarput. Tamassumani inuit ataasiakkaat suliffeqalernissaannut kajumissuseqalersinneqassapput. Aamma innuttaasorpasuit suliffeqarfii pisortallu ikiuisarnerisa akornanni uteqattaartartut takussaapput. Taamaalilluni innuttaasorpasuit suliffeqarfinnut atassuteqarput, tassanilu ilimagineqarpoq suliniut atuutilersinneqarpat pisortat ikiorsiissutaannik pisartagaqarani inuit ataasiakkaat suliffeqalernissamut kajumissuseqalernissaannut sunniuteqassasoq. Taakku siunnersuummi pingaarnertut anguniagaapput. Oqaatigineqareersutut nunani allani misissueqqissaarnerit takutippaat sulinermut ilanngaat pitsaasumik sunniuteqartartoq imminullu aningaasalersorsinnaaneq qaffasissuusoq.

Kommunip aamma ilimagaa atorfeqarnermik ilanngaammik aningaasalersuineri kommuninut nunalu tamakkerlugu akileraarutini aningaasalersuisarnernut allanut najoqqutassiat assingi malinneqassasut.

Kommunip suna innersuussutigineraa erseqqarivissumik allaqanngilaq. Oqaatigineqassaarli kommunit DUT-mik tunngaviup kingunerisaanik siunnersuutip aningaasatigut sunniutissaanik taarsiivigineqartussaassasut. Siunnersuutip pisortanut aningaasatigut kingunissaanik allaaserinninneq innersuussutigineqarpoq.

SISA

SISA siunnersuummut namminermit oqaaseqaatissaqanngilaq, tassa SISA-p siunnersuummi siunertaq tamakkiisumik akuersaarmagu, tassunga ilanngullugu minnerunngitsumik innuttaasut appassisumik akunnattumillu isertitallit procentit katitikkat qaffasinnerpaaffiannik ajornartorsiuteqartut.

SISA-lli uparuarpa, ataqatigiinnernik ajornartorsiutit tamassuma assingi innuttaasut annikitsunik akunnattumillu annertussusilinnik soraarnerussutisiassanut ileqqaarutaannut aamma atuuttut.

SISA-p oqaatigaa soraarnerussutisiaqarnermik aaqqissuussinermi akiliiffigineqartarnerup kingunerisaanik utoqqalinersiat appartinneqarnerat procentit annertunerpaaffigisassaannik qaffasissorujussuarnik kinguneqassasoq. Soraarnermut inooqataasumut, tassani apparisaq isertitaqarani, ilassutaasumik ukiumut soraarnerussutisiat 93.000 kr.-usut ilassutaasumik soraarnerussutisiat appartikkiartuaarnissaat ilanngukkutsigu akileraarutillu 42 %-iutikkutsigit procentit qaffasinnerpaaffiat 59 %-iussaaq. Ilassutaasumik soraarnerussutisiat 235.000 kr.-t sinnerpatigit procentit qaffasinnerpaaffiat 71 %-iussaaq. Taamaamat 327.000 kr.-t sinnerlugit soraarnerussutisiaqaraanni tunngaviusumik soraarnerussutisiat ilassutaasumillu soraarnerussutisiat atorunnaavissapput procentillu qaffasinnerpaaffiat 42 %-imut appassalluni.

Procentit katitikkat qaffasinnerpaaffiat taamaalillutik inatsisissatut siunnersuummut nassuiaatit malillugit inoqutigiinnut ineqarnermut tapiissutilinnut, meeqqanut tapiissutiniq pissarsisartunut akilli tunngavigalugit taparserneqartunut atuuttut qaffaseqatigissavaat.

Tamanna innuttaasut utoqqalinissanimut ilaqqaarusussiannut kajumissaataanngilaq, assersuutigalugulu soraarnerussutisiaqarnissamut aaqqissuussinermut pinngitsoorani ilaanissaq pillugu Inatsisartut inatsimmi siunertaalluaraluartunut aammalu utoqqalinissamut innuttaasut ileqqaarnissaasa siuarsarnissaa pillugu Namminersorlutik Oqartussat kissaatigilluinnagaannut akerliulersitsisinnaalluni.

Isumaginninnermi ikiorsiissutit allat, soraarnerussutisiassanut ileqqaakkat kiisalu sillimmasiinnermit matussuserneqartartut soraarnerussutisiassanik aaqqissuussinernut

atagajuttartut akornanni sunneeqatigiittarnerannik tassunga assingusunik naatsorsuisoqarsinnaavoq.

SISA-p taamaammat Aningaasaqarnermut Naalackersuisoqarfik soraarnerussutisiassanut ileqqaakkanut sillimasiinernullu taakkununga atasunut tunngatillugu procentit katitikkat annertunerpaaffiisa appartinnissaannut periarfissat misissoqqullugit kaammattussavaa.

Aallaqqaasiullugu oqaatigineqassaaq sulinermit ilanngaat siunnersuutikkut atuutilersinniarneqartoq. Siunnersuutip soraarnerussutisiassat akilernerqartut akileraaruserneqartarnerat utoqqalinersialluunniit annertussusaat sunnissanngilai.

Naalackersuisut SISA-p taamatut isummersornerani ataatsimut isigalugu isumaqatigaat, innersuussutigissallugulu utoqqalinersiat pillugit Inatsisartut inatsisaannut allannguutissat siunnersuutip saqqummiunneqarnissaa Naalackersuisut ilimagigaat. Siunnersuummi siunertaavoq utoqqalinersiutit tunngaviusumik aningaasartaasa killingisa qaffanneqarnissaat tapillu saniatigut isertitaqartarnerup kinguneranik appartikkiartuaarneqassasut (Soraarnerussutisiaqartup utoqqalinersiutit saniatigut isertarisinnaasai allat). Aamma siunnersuutigineqarpoq appartitsiartornermi procenti appartinneqassasoq. Siunnersuut assersuutigalugu utoqqaat suliffeqarnermi soraarnerussutisiaqalernissamik aaqqissuussinermi peqataasut soraarnerussutisiallillu suliffeqartut pitsaanagerusumik oqimaaqatigiissinnissaasa qulakkeerneqarnissaanut pingaaruteqarpoq.

Isumaginninnermut Inatsisinillu Atuutsitsinermit Naalackersuisoqarfik (IIAN)

Naalackersuisoqarfiup sulinermit ilanngaatiq atuutilersinneqarnissaa pitsaasutut isigaa, taamaalilluni suliffeqarnissamut kajumissuseqarneq annertunerulerniassammat, aammalu pingaartumik appassisumik akunnattumillu isertitaqartartut aningaasanik annertunerusunik atugassalerniassammata.

Naalackersuisoqarfilli marlussunnik oqaaseqaatissaqarpoq.

Naalackersuisoqarfiup siusinnerusukkut oqaatiginikuuaa sulinermit ilanngaammi siunertaq pingaarneq tassaasoq suliffeqarani pilersorneqarnermiit suliffeqalivinnissamut kajumissuseqartitsilernissaq.

Inatsisissatut siunnersuut malillugu suliffeqarnermit ilanngaat innuttaasunut 180.400 kr.-t aamma 350.000 kr.-t akornanni isertaqartunut ukiumut 9.600 kr.-nik annertussuseqassaaq, taakkulu taamaammat sulinermit ilanngaammi assigiiaartumik annertussusilimmik qaffaaffigineqassanngitsut appaaffigineqassanngitsulluunniit. Sulinermit ilanngaammik atuutilersitsinermit taakkununga sulinermit aningaasatigut pissarsiassaq assigiippoq, 180.400 kr.-nik imaluunniit 350.000 kr.-nik isertitaqartarneq apeqquataatinnagu, taamaammat sulinermit ilanngaat taamaalilluni taakku sulinerulernissaannut kajumissaataanngilaq.

Taakkunanga amerlasoorujussuit piffissaq tamaat suliffeqareerput, taamaalillutillu sulinermut ilanngaatip kinguneranik sulinerulernissamut kajumissaarneqassanatik.

Sulinermut ilanngaat taamaammat akunnattumik isertitaqartartunut amerlasoorujussuarnut akileraartarnermi oqilisaataassaaq.

Oqaaseqaat ilanngunneqanngilaq. Ilumoorpoq siunnersuut inunnut sulinermut ilanngaatip qaffannissaanut aningaasat killissaat qaangerlugit isertitaqartunut akileraarutit annertunerpaaffiisa annikillinissaannik kinguneqassanngitsoq. Siunnersuummi aningaasat killingi imatut aalajangerneqarput, inuit annikitsunik isertitaqartut sulinerunissaannut kajumissuseqarnerat annertunerulersinneqassalluni taamaalillutillu isertitatik annertunerulersissallugit.

Aningaasat killingi aamma imatut aalajangerneqarput, inuk piffissami tamarmi sulinermigut SIK-mi isumaqatigiissut malillugu akissarsiat annikinnerpaaffissaasa annertoqataanik ukiumut isertitaqartoq sulinermut ilanngaatit qaffasinnerpaaffiannik pissarsisinnaanngortillugu. Ingerlatsinerup allanngoranngitsup siviluneranut tunngaviusoq tassaavoq, annikilliarortitsineq tamassumalu kingunerisaanik annikilliarortitsinerup kingunerisaanik akileraarutit annertunerpaaffissaasa annertunerulaarnerat aatsaat inunnut annertunerungaatsiartunik isertitaqartunut atuutilertariaqarnerat. Siunnersuut inuit tamarmik sulinermut ilanngaatip aningaasanut killingisa iluanni sulinermit isertitaqartut atorsinnaasuminnik qaffasinnerusumik aningaasaateqalernissaannik naggataatigut kinguneqassaaq.

Naalackersuisoqarfik isumaqarpoq sulinermut ilanngaat siusinnerusukkut annikilliarortinneqarpat/atorunnaarsinneqarpat sulinernullu ilanngaat isertitanut 250.000 kr.- t tikillugit qaffanneqarsinnaappat sunniuteqarnerussasoq, tassa taakuummata suliffeqarnatik pilersorneqartut, piffissap ilaani sulisartut imaluunniit SIK-p isumaqatigiissutaa malillugu akissarsiat minnerpaaffissaannik akissarsiaqarlutik piffissami tamarmi sulisartut, taamaalillutillu periarfissaqartut.

Sulinermut ilanngaammi siunertaq pingaarnaq tassaavoq innuttaasut suliffeqaratik pilersorneqartut (pisortanit ikiorserneqartartut) amerlanerusut suliffeqalernissamut kajumissuseqartilernissaat kiisalu pingaartumik annikitsunik isertitaqartartut iluaqutigissagaat.

Oqaaseqaat ilanngunneqanngilaq. Sulinermut ilanngaammi qaffaanermut appaanermullu aningaasat killissavii illersorlugit akerlilerlugillu oqallittoqarsinnaavoq. Tamanna politikikkut inaarutaasumik aalajangerneqartussaavoq. Oqaatigineqassaaq siusinnerusukkut annikilliarortitsineq akileraarutit qaffasinnerpaaffissaasa qaffannerannik tassungalu atatillugu akileraarutit qaffasinnerpaaffiisa qaffannerisa siusinnerusukkut atuutilernerannik kinguneqassasoq, taamaamallu isumaginninnermi ikiuutit, soorlu ineqarnermut tapiissutit, appariartortinneqarneranut annertunerusumik atassuteqassasoq. Tamanna akileraarutit

qaffasinnerpaaffiisa katitigaanerat mianerissagaanni annikilliertortitsinerup qaffasingaatsiartumut inissinniarneqarnissaanut tunngilersuutaasinnaasutut isikkoqarpoq. Nassuiaatini nalinginnaasuni immikkoortoq 2.2-mi takussutissiaq innersuussutigineqarpoq. Assersuutigalugu ersippoq inunnut marlunnik meeralinnut ukiumut 300.000-400.000 kr. akornanni isertitalinnut procentit qaffasinnerpaaffissaat 55 – 58 %-i akornanniillutik qaffasingaatsiartut.

Nassuiaatini nalinginnaasuni innuttaasunut kingunissaat pillugu immikkoortumi 6-imi (qup. 9-mi) ersippoq innuttaasut “aningaasat atorsinnaasaat 4.100 kr. tikillugit annertusissapput”. Erseqqissarneqartariaqarpoq taamaallaat isertitaqartut immikkoortuisa ilaannut tamanna atuuttoq, tassa isertitat apeqqutaallutik sulinermut ilanngaammik atuutilersitsinermi aningaasatigut pissarsiassat assigiinngitsuummata.

Oqaaseqaat ilanngunneqarpoq.

IIAN-ip aamma oqaatigaa, qaffatsiartornermi procenti appartitsiartornermilu procenti inatsisissatullu siunnersuummi toqqaannartumik allaqqappat paasinninnek atuaruminartuuneralu annertusisinneqassasut.

Oqaaseqaat ilanngunneqanngilaq. Inatsisip oqaasertaani periutsit assigiinngitsut arlallit atorlugit qaffaanerni appaanernilu kisitsit allannissaasa naleqquttuunera takuneqarsinnaanngilaq. Aamma oqaatigineqassaaq inatsimmik oqaasertaliineq tusarniaareernermi allanngortinneqartoq, taamaalilluni sulinermut ilanngaammik naatsorsuineq ersarinnerusumik allaqqalluni. Allannguut sulinermut ilanngaatiq annertussusianut pingaaruteqanngilaq.

Soraarnerussutisiaqalernissaq siunertaralugu ileqqaakkat pillugit siunnersuut ukununnga nassiunneqarpoq: Sulisitsisut, NUSUKA, SISA, SIK, IMAK, ASG, AK, PPK, KNAPK, Deloitte, Grønlands Revisionskontor, BK Revision, EY Grønland, BDO, GrønlandsBanken, Banknordik, Kommune Kujalleq, Kommuneqarfik Sermersooq, Qeqqata Kommunia, Avannaata Kommunia, Qeqertalik Kommunia, Nunatsinni Advokatit, Inuussutissarsiornermut, Nukissiuuteqarnermut Ilisimatusarnermullu Naalakkersuisoqarfik aamma Isumaginninnermut aamma Inatsisinik Atuutsitsinermut Naalaakkersuisoqarfik.

Oqaaseqaatit tiguneqartut nalinginnaasumik naqinnilerlugit naalisarlugit ataani issuarneqarput, Naalakkersuisullu oqaaseqaataat *uingasunngorlugit* allanneqarlugit.

Grønlandsbankenip siunnersuut tamatigoorpasinnerusoq soraarnerussutisiaqartitsinermilu periutsinut pitsaanerpaanut naleqquttoq akuersaarpa. Soraarnerussutisiassanik ataasiakkaanut aningaasaliisinnaanermut periarfissap killilerneqarnissaa aningaasaateqarfiup killilerusussimangikkaluaraa saniatigut aningaasaateqarfik annertunerusunik

oqaaseqaatissaqanngilaq. Innuttaasut maannakkut nammineq qinersisinnaanermut tunngatillugu ullumikkut killiliiffigineqartussat ikittuinnaapput.

Innuttaasut malittarisassat atuuttut malillugit soraarnerussutisiassaqalernissaq siunertaralugu ileqqaarnermik atuisut sunut aningaasaliisinnaaneranmut tunngatillugu ilaatigut killilersuiffigineqarput. Innuttaasut utoqqaaneruleriartortillugit aningaasaliissutit ajutooriataaffigisinnaaanerat annikinnerussaaq. Tamanna atuuppoq innuttaasoq nammineq aningaasaleerusunnersoq imaluunniit aningaaserivimminiit siunnersorneqarnissamik atuerusunnersoq apeqqutaatinnagu. Innuttaasut tamakkiisumik namminerluinnaq aningaasaliisinnaanerat siunnersuutikkut pinngitsoortinneqarpoq. Akerlianik ukioqassuseq apeqqutaatillugu aningaasaliinissamut killiliussat atorunnaarsinneqarput, innuttaasullu aningaaseriviit toqqagaannik aningaasaliiffiusinnaasut akornanni toqqaanissamut periarfissaqalerput. Siunnersuut innuttaasut namminneq toqqaasinnaaneranmik killiliinerugunarani allannguinermut takussutissaanerugunarpoq.

Tusarniaaffigineqartut allat siunnersuummut oqaaseqaatissaqassanngillat.

Aalajangersakkanut ataasiakkaanut nassuiaatit

§ 1-imut

Nr. 1-imut

Aalajangersakkap nassataraa, akissarsiat, Politiets Efterretningstjenestemi immikkut kukkuniuinerup ataani akissarsiaritinneqartut, maannakkorpiaq akissarsiatut naatsorsuutini ilaasanninnissai.

Aalajangersakkamik siunertaavoq, Politiets Efterretningstjenestep nunami isumannaatsuunissamut il.il. inuit tapeeqataasut ajunngitsorsiaqartissinnaagaat kinaassusaat imaluunniit attuumassuteqarnerisa imarisaat saqqummiutinnikkaluarlugu.

Nr. 2-mut

Siunnersuutigineqarpoq, sulinermut ilanngaammut malittarisassanik imaqartoq kapitali 3 a nutaaq ilanngunneqassasoq.

Nr. 3-mut

§ 38 a-mut

§ 38 a-tut siunnersuutigineqartoq, inuit sulinermut ilanngaammik piginnaatinneqarneranik piunasaqaatinik imm. 1-imi aalajangersaavoq.

Imm. 2-mi aalajangersakkami nr. 1-2-mi piunasaqaatit tamarmik naammassineqarsimasariaqarput inuup sulinermut ilanngaammik pisinnaanissaanut.

Imm. 2, nr. 1-imi aalajangersarneqarpoq, aaqqiissummi pineqartut tassaasut inuit, Kalaallit Nunaanni tamakkiisumik akileraartussaataasut, kiisalu marloqiusamik akileraartarneq pillugu isumaqatigiissut naapertorlugu akileraartarnikkut Kalaallit Nunaata avataani najugaqanngitsut.

Tunngaviuvoq, sulinermut ilanngaatinissap inuup Kalaallit Nunaanni tamakkiisumik akileraartussaataaassasoq, kiisalu assersuutigalugu marloqiusamik najugaqartoqarnerani, inuk akileraartarnikkut isigalugu Kalaallit Nunaanni najugaqartutut isigineqassasoq.

Taamaattoqanngippat, inuk siunnersuummut ilaangilaq.

Akileraartussaataaneq ukiup isertitaqarfiusup ilaannaani atuuppat, akileraartussaataasooq sulinermut ilanngaatip ilaannaanik pisinnaassaaq § 12, imm. 1-imi malittarisassaata naapertorlugit.

Imm. 2-imi aalajangersakkami nr. 2-mi aalajangersarneqarpoq, inuit tamakkiisumik akileraartussaaneermi aaqqiissummi ilaasut, sulinermut ilanngaammik pisinnaanngitsut.

Tamatumani pineqarput inuit avataaneersut, assersuutigalugu namminersorlutik oqartussat mittarfinnik suliniutaanni suliaqartut.

§ 38 b-mut

Aalajangersakkami imm. 1, nr. 1-3-p imarai akit siunnersuutigineqartut aamma sulinermit ilanngaammi aningaasat killigitinneqartut.

Imm. 1, nr. 2 malillugu sulinermit ilanngaat procentip annertussusissaatut siunnersuutigineqartoq atorlugu appariartortinneqassaaq. Aalajangersakkami oqaaseqatigiit aappaanni erseqqissarneqarpoq sulinermit ilanngaat 0-imit appasinnerusinnaanngitsoq.

Imm. 2-mi siunnersuutigineqarpoq, aningaasat aamma isertitanut tunngavik ukiumi aningaasaqarfiusumi pineqartumi akinik nalimmassaanermi procenti naapertorlugu ukiumoortumik iluarsineqartassasut. Akinik nalimmassaanermi procenti ukiut tamaasa aggustip qaammataani avammut nalunaarutigineqartarpoq.

Inummut aalajangersimasumillu ilanngaatip aningaasartaasa killingi akinik nalimmassaanermut procenti atorlugu aaqinneqartassanngillat, kisiannili ukiumi isertitsiviusumi pineqartumi procenti aaqqiissutissaq aamma maannakkorpiaq aningaasarsiat pillugit Inatsisartut inatsisaanni qanoq aalajangerneqarnerisoeq apeqqutaassalluni.

§ 38 c-mut

§ 38 c aamma § 38 d siunnersuutigineqartut sulinermit ilanngaammut tunngaviusumik isertitaasunik killilersuipput.

Tunngaviusumik isertitat Soraarnerussutisiaqalernissamut aaqqissuussamut pinngitsoorani ilaanissaq pillugu Inatsisartut inatsisaanni ileqqaakkat tunngavii aallaavigalugit aalajangersarneqarput. Tunngaviusumilli isertitat taakku marluk akornanni nikinganerit, Inatsisartut inatsisaasa taakku marluk siunertaasa assigiinngitsut pissutigaat

Isertitat A-t aamma B-t akileraarutaasussaasut aallaavigineqassapput. Tamatuma imaraa Isertitat-A-ni tamakkiisumik isertitat, tassani pineqartup ilanngaatai, ass. ernianut aningaasartuutit isigineqanngimmata. Isertitat-B-ni ilanngaaseereerluni isertitat ilanngunneqassapput, t.i. ingerlatsinermit aningaasartuutit il.il. ilanngaatigineqareernerisa kingorna isertitat ilanngullugit aningaasarsianit akileraarutit pillugit Inatsisartut inatsisaanni malittarisassat tunngaviillu nalinginnaasut naapertorlugit, ass. amigartoornerit ilanngullugit naatsorsuunneqarnissaannut killiliinernut atatillugu.

Siunnersuutigineqarpoq, akileraarutitigut ilanngaasinnaatitaalluni aamma nammineq sulisisisullu akiliutit akileraarutit naatsorsorneranni ilanngunneqarsinnaatitaangitsut atorlugit soraarnerussutisianut akiliutit isertitanut tunngavinni ilanngunneqassasut. Tamatumani siunertarineqarpoq qulakkeerneqassasoq, isertitanut tunngavik assigiiaassasoq

soraarnerussutisiaqarlernissamut aaqqissuussinermi ilanngaateqarsinnaatitaaneq nammineq sulisisulluunniit akiliutaata akileraarutinit ilanngunneqanngissinnaatitaaneri ilanngullugit ilanngunnagilluunniit pineqarnersoq apeqqutaatinnagu.

Akissarsisartut kiisalu namminersorlutik inuussutissarsiummik ingerlatsisut erninermi sulinngiffeqarnermi ullormusiaat, naartunermi, erninermi meeravissiaartaarnermilu sulinngiffeqartarneq ullormusiaqartarnerlu pillugit Inatsisartut inatsisaat naapertorlugu erninermi sulinngiffeqarnermi il.il. tigusaagaat tunngaviusumik isertitanut ilaapput.

Imm. 2-imi siunnersuutigineqarpoq, Kalaallit Nunaanni suliffeqarfinit iluanaarutinit isertitat tunngaviusumik isertitatut naatsorsorneqartassasut. Aalajangersakkap ilaatigut qulakkiissavaa tunngaviusumik isertitat assigiissaartumik ajornanngitsumillu naatsorsorneqartarnissaat, tassani assersuutigalugu suliffeqarfinni nunani allaneersunit iluanaarutit kiisalu ernianit isertitat aalajangersakkami imm. 1 naapertorlugu tunngaviusumik isertitanut ilaammata. Aalajangersakkattaaq isertitat suliffeqarfimmit akissarsiatut iluanaarutitullu qanoq tiguneqarsinnaanerinik aningaasannanniarsinnaanermut aarlerinaammik pinngitsoortitsissaaq.

§ 38 d-mut

Imm. 1-imi aalajangersakkanik aalajangersarneqarpoq, isertitat assigiinngitsut ilaat, isertitanik tunngavimmik nassuiaasiinermi ilaasussaagaluartut isertitanut tunngavinnit ilaanngitsut. Tamatumani pineqarput isertitat, soraarnerussutisiaqalernissamut aaqqissuussinermut pinngitsoorani ilaanissaq pillugu Inatsisartut inatsisaanni § 4, imm. 1-2-mi aalajangersarneqartut. Tamatumani pineqarput soraarnerussutisiat, matuma ataani atorfilittatut, suliffeqarfimmit, siusinaarluni soraarnerussutisiat aamma utoqqalinersiat, isumaginninnikkut ikiorsiissutit arlallit, matuma ataani ilaatigut ineqarnermut tapiissutit, meeqqanut tapiissutit, ilinniagaqarnersiat aamma meeqqanut ikiorsiissutit. Kisiannili inatsisit § 4, imm. 1, nr. 1-3-mi taaneqartut naapertorlugit isertitat tunniunneqartartut tunngaviusumik isertitanut ilaapput. Matumani pineqarput namminersorlutik oqartussani aamma kommunini il.il. atorfilittanut akissarisaritit akissarsiaat.

Imm. 2-mi aalajangersakkamik isertitat ilaat tunngaviusumik isertitanut ilaatinneqanngillat.

Aalajangersakkamik aalajangersarneqarpoq, tunngaviusumik isertitanut ilaanngitsut isertitat §§ 70 aamma 71-imi ilaasut. Tamatumani assersuutigalugu ilaapput umiarsuarni sulinermi akissarsiat akileraartarnermik ingerlatsivimmi ilanngaaseereerluni akissarsiat nalunaarsuivianni ilaasut, tiguisumut akileraarutaasussaannngitsut.

§ 38 e-mut

Imm. 1-imi aalajangersakkani aalajangersarneqarpoq sulinermut ilanngaati naatsorsorneranut tunniunneranullu malittarisassat. Sulinermut ilanngaati naatsorsorneqartarpoq inaarutaasumik naatsorsuinnermut atatillugu kiisalu akileraarutinit sinneqartoorutaasut tunniunneqarneranut atatillugu tunniunneqartarluni.

Sulinermut ilanngaammik ileqquusumik akiliinerup pineqarnera tunngavigalugu, akileraarutininik aqutsineq pillugu Inatsisartut inatsisaanni § 25, imm. 2 malillugu aningaasat 2 %-iannik taarsiisoqassanngilaq.

Akileraartarnermik ingerlatsiviup periarfissaraa sulinermut ilanngaatiq nalinga allatut naatsorsorsinnaassallugu, soorlu tamanna akileraarutininik sinneqartoorutaasunut atuuttoq.

Imm. 2-mi siunnersuutigineqarpoq, akileraartarnermut ingerlatsivik ukiumoortumik innuttaasumut naatsorsuutininik nassiussisassasoq, tassani takutinneqassaaq tunngaviusumik isertitat, sulinermut ilanngaatiq naatsorsornerani aamma sulinermut ilanngaammik naatsorsuinermi.

Nr. 4-mut

§ 47 c-mut siunnersuummik siunertaavoq soraarnerussutisiaqalernissamut ileqqaakkat pillugit Kalaallit Nunaanni malittarisassat, malittarisassanut ukiuni kingullerni Danmarkimi naammassineqartunut naleqqussassallugit, taamaasilluni Finanstilsynip Kalaallit Nunaanni aningaaserivinnik soraarnerussutisiaqalernissamullu aningaasaateqarfinnik nakkutilliineranut sinaakkutinik immikkut ittunik aningaasartornartunillu pisariaqalersitsissanngimmat.

Suli qulakkeerneqassaaq, oqimaatigiissitsisoqassasoq soraarnerussutisiaqalernissamut ileqqaartut ileqqaakkaminnik naammaginartumik iluanaaruteqarnissaat, taamaasilluni ileqqaakkat nalinga paarineqaannarnissaa eqqarsaatigalugu, soraarnerussutisiaqalernissamut ileqqaartut pigisani nalilinni paasineqarsinnaanngingajattuni aningaasaliinissamut aarlerinaammik tigusillutik, ileqqaakkat nalingata annaananik kinguneqannginnissaa eqqarsaatigalugu.

§ 47 c, imm. 1-imi aalajangersakkamik siunertaavoq qulakkiissallugu, soraarnerussutisiaqalernissaaq siunertaralugu ileqqaartut ataasiakkaat aarlerinaammik siumut isigineqareersinnaanngitsumik tigusinnginnissaat. Tamatumunngalu atatillugu siunnersuutigineqarpoq, aningaasanik ileqqaakkanik aningaasaliinerit soraarnerussutisiaqalernissamut aningaasaateqarfinni, aningaaserivimmit neqeroortutigineqartuni pissasut. Innuttaasulli soorunami ileqqaakkatik allat (aningaasat killilersugaanngitsut) killilersugaanngitsumik piumasaminnik aningaasaliissutigisinnaavaat, ileqqaakkalli taama ittut Aningaasarsianit akileraarutit pillugit Inatsisartut inatsisaanni kapitali 4 a-mut ilaassanngillat. Taamaattumik ileqqaakkat aningaasanit akileraarutaasimasuneersuussapput, ileqqaakkallu akiligassaqarfiusunit eqqartuussivikkoortitsisinaanermut illersugaanngillat.

§ 47 c, imm. 2-mi aalajangersakkap imarai piumasaqaatit, aningaaserivinnut, ileqqaartut sinnerlugit aningaasaliinissamik suliassamik tigusineranni piumasaqaatigineqartussat. Piumasaqaatit assingaat, aningaaserivinnut Danmarkimi pilersinneqarsimasunut atuuttut.

Finanstilsynet aningaaseriviit soraarnerussutisiaqalernissamut aningaasaateqarfiit allaffissornerannik nakkutilliisuvoq. Aningaaserinermik suliffeqarfiit pillugit inatsimmi, Kalaallit Nunaanni aamma atuuttumi, tak. kingullermik peqqussut nr. 838, 14. august 2012-imeersumi kiisalu peqqussut nr. 1676, 16. december 2015-imeersumi § 50 naapertorlugu, Finanstilsynet ileqqaakkanut soorlu ass. nammineq soraarnerussutisiassanut aningaaserivimmi aningaasaateqarfinniittunut, matuma ataani aningaasat inissinneqarneri, allaffissornerat, naatsorsornerat, kukkunersiornerat sullitanullu paasiissutissat pillugit sukumiinerusumik malittarisassanik aalajangersaasinnaavoq.

§ 47 c, imm. 3 aamma 4-mik siunertaavoq, aningaaserivik soraarnerussutisiaqalernissamut aningaasaateqarfimmik 1-imik imaluunniit arlalinnik sullissaminut neqerooruteqarsinnaassasoq, ima aaqqissorneqarsinnaasunik, aningaaserivik ataaseq aningaasaliinernut akunnattumit appasinnerusunik aarlerinaateqarluni, tassanilu aningaaseriviup sullitat ileqqaagaanik inissiisinnaaffinik, allamik kissaammik saqqummiussinngippata (aningaaserivik toqqaassaaq). Sullitat ataasiakkaat taamaasillutik aningaaserivimmiittut pigisat nalillit ilaannik piginneqataassapput, sullitallu arlallit aningaasaateqarfimmi ataatsimi sipaartarmata, aarlerinaatit annertuumik siammarnerannik angusaqarsinnaapput.

Aningaaserivik aningaasaateqarfinni allani, qaffasinnerusumik imaluunniit appasinnerusumik aarlerinaateqarfiusumi aningaasaliinissamut neqeroornissamut toqqaasinnaavoq, tassani sullissat ileqqaakkatik aningaasaateqarfinni taakkunani inissinnerisigut, qaffasinnerusumik iluanaaruteqarniarnermut, imaluunniit aappaatigut aningaasaliinerit annaaneqannginnissaannut sapinngisamik qaffasinnerpaamik qulakkeerinninnissamik kissaateqarnermut sunniisinnaanermik angusaqassallutik.

Ileqqaartumut aningaasaliinissamut tamakkiisumik kiffaanngissuseq tunniunneqarsinnaanngilaq, aningaaserivik aningaasaateqarfinnut taakkununga aamma atatillugu iluanaarutit aarlerinaatillu akornanni oqimaaqatigiinnermik naammaginartumik anguniagaqarnissamut pisussaaffeqarmat. Aningaaseriviup pigisat nalillit, aningaasaateqarfinni neqeroorutigineqartussat toqqassavai, pigisanillu nalilinnik Finanstilsynip aningaasaliinermi nioqqutissat aarlerinaataannik nalunaarsuineq pillugu nalunaarutaani nr. 553, 1. juni 2016-imeersumi ”aappaluttut” nalunaaqutserneqarsimasunik toqqaasinnanani.

Aningaaseriviit ataasiakkaat aalajangissavaat, soraarnerussutisiaqalernissamut aningaasaateqarfiit qassit suullu sullitaminnut neqeroorutigissanerlugit.

§ 47 c, imm. 5 malillugu, aningaaseriviup aningaasaateqarfinni ataasiakkaani pigisanik nalilinnik toqqaanermi killiliussat, § 47 d, imm. 1-imi aamma 2-mi ersertut eqquutsissavai. Matuma malittaraa, aningaasaateqarfinni aningaasat illuutini imaluunniit aktiani nalunaarsorsimannigitsuni imaluunniit inuussutissarsiorluni suliffeqarfimmi namminersortumi

piginneqataanerni aningaasaliissutaasinnaanginnerat. Ilanngullugu aningaasaateqarfimmut pigisanik nalilinnik, aningaasaliissutit katillugit pappialanik nalilinnik tunniussisumit ataatsimeersut aningaasaateqarfiup aningaasaataasa 20 procentia sinnerlugu pisisoqarsinnaanngilaq, takuuk § 47 d, imm. 2.

Nr. 5-imut

§ 47 e, imm. 1-imi oqaasertaliinermik nutaamik qulakkeerniarneqarpoq, soraarnerussutisiaqalernissamut kontumi aningaasat ileqqaakkat, soraarnerussutisiaqalernissamut aningaasaateqarfimmi inissinneqarsimasut, qaffanneqarsinnaassanngitsut, aningaaseriviup naatsorsuineranit erseraluartoq, pigisanik nalilinnik iluanaaruteqaataasumik tunisineq iluatsinneqarsimasoq. Taarsiullugu tunisinermi aki aningaasaliissutaqqissaq, taamaasilluni soraarnerussutisiaqalernissamut ileqqaartut ataasiakkaat toqqorsivimmi uninngasuutaasa nallingi qaffassallutik. Taamaasillutik soraarnerussutisiaqalernissamut ileqqaartut ataasiakkaat iluanaarutimi ilaat akiliissutigisinnaassanngilai taallugulu, uninngasuutit allanngunngitsut naammaginartuussasut.

Soraarnerussutisiaqalernissaq siunertaralugu ileqqaakkat siunissaq ungasissoq eqqarsaatigalugu ileqqaagaapput, ukiumilu ataatsimi sinneqartoorutit ukiup tulliini amigartoorutitik annikillisarneqarsinnaasutut eqqarsaatigineqarsinnaapput. Aarlerinaatinik missingersuineq taamaalilluni nikerarnerit taakku soraarnerussutisiaqalernissamut aningaasaateqarfimmi attatiinnarneqarnissaanik kinguneqassaaq, taamaattumik § 47 h, imm. 2 naapertorlugu akiligassaqarfiit eqqartuussivikkoortitsisinnaanerannut illersugaalluni.

Nr. 6-imut

§ 88, imm. 2-mik allanngortitsinermi siunnersuutigineqarpoq, suliffeqarfiit pisussaaffilerneqassasut nalunaarutigissallugu, ingerlatseqatigiiffiup iluanaarutaanik kikkut tiguisuunersut. Suliffeqarfiit akileraarnermut ingerlatsivinnut tamanna nalunaarutigisassavaat, iluanaarutitik akileraarutaasussanik uninngatitsinermut nalunaaruteqarnermut atatillugu.

Naalackersuisut qanimut aalajangersakkanik aalajangersaassaaq nalunaarut qanoq isikkoqarluni tunniunneqartassanersoq.

§ 2-mut

Imm. 1-imi siunnersuutigineqarpoq Inatsisartut inatsisaat ulloq 1. januar 2020-mi atuutilersinneqassasoq, taamaattoq aningaasarsianit Politiets Efterretningstjenestemi kukkuneruunermut suleriaatsit immikkut ittut malillugit aningaasaliissutinit tunniunneqartunit akileraartitsinnginnissaq pillugu maleruagassat nutaat ilaanatik, takuuk imm. 3.

Imm. 2-mi siunnersuutigineqarpoq sulinermut ilanngaat ukioq isertitaqarfiusoq 2020-mit eqqunneqassasoq.

Imm. 3-mi siunnersuutigineqarpoq, Naalakkersuisut piginnaatinneqassasut akissarsiat immikkut kukkunersuinerit ataanni Politiets Efterretningstjenestemit akissarsiaritinneqartut akileraaruteqaataajunnaarnissaat pillugu aalajangersakkap ulloq atuutilerfissaa nalunaarutikkut aalajangersarsinnaassagaat. Tamatumanga qulakkeerneqassaaq Politiets Efterretningstjeneste pillugu inatsimmut aaqqiissutip atuutilerpat aalajangersagaq atuutilissasoq.

Imm. 4 aamma imm. 5 soraarnerussutisianut ileqqaarnernut aalajangersimasunut, inatsisip atuutilernerani § 47c-imi maleruagassanut maannamut atuuttunut naapertuuttunngortinneqarsimasunut, ikaarsaarnermut maleruagassanik imaqarput.

Soraarnerussutisiaqalernissamik ileqqaartunut ileqqaakkat aningaasaateqarfimmi, siunissami soraarnerussutisiaqalernissamut ileqqaakkat inissinnissaannut periarfissinnissaat pisariaqartinneqarpoq. Soraarnerussutisiaqalernissamut toqqorsiviit 2016-imi inatsisip kingorna pilersinneqartut, taamaattumik aningaasaateqarfimmut, aningaaserivimmit neqeroorutigineqartumut nuunneqassapput, pigisat nalillit aningaasaateqarfimmut atuuttumut aalajangersakkat eqquutsippagit. Nuussineq piffissaliussap qaammatit 24-t qaangiutsinnagit pissaaq, toqqorsivinnik mikisunik attassiinnarnermi allaffissornikkut aningaasartuutit allanut sanilliullugit qaffasippallaarmat. Tassunga ilaavoq, toqqorsivimmik ingerlaavartumik oqimaaqatigiissaareqqinnissamik pisussaatitaaffimmik atorunnaarsitsinermut piumasagaataasoq, ileqqaakkat soraarnerussutisiaqalernissamut aningaasaateqarfimmut ilaanissaat.

Pigisat nalillit soraarnerussutisiaqalernissamut aningaasaateqarfimmut piumasagaatit naammassinngippatigik, pigisat nalillit aningaasaateqarfimmut nuunneqarsinnaanngillat, taamaattumillu toqqorsivik atorunnaarsinneqassaaq, tunisinermi naliusoq soraarnerussutisiaqalernissamut aningaasaateqarfimmut inissinneqarsinnaassammat. Naammaginarpoq soraarnerussutisiaqalernissamut ileqqaartoq tunisinissamut qaammatinik 24-nik piffissalissallugu, taamaasilluni ileqqaartoq piffissakilliortutut misigissanngimmat, piffissami naammaannartumi tunisinermik kinguneqarsinnaasumi.